

NHUPI WOOREERA
WA
YESU KRISTU
WANTIKHIYE NI

Marku
Mttakattifu

Ficha Técnica:

Título: Marku Nttakattifu
(O Evangelho de Mark)
(The Gospel of Mark)

Língua: Imeetto

Primeira edição electrónica, 2010

Produzido por: PROMEETTO
lidemo.net@gmail.com
C.P. 652
Nampula, Nampula
Moçambique

O utilizador pode copiar e distribuir a obra

**Nhupi Wooreera Wa Yesu Kristu
Wantikhiye Ni**

Marku Nttakattifu

1

Yohani Mpatisa

¹Wiipaceroni wa Nhupi Wooreera wa Yesu Kristu, Mwanawe Nluku. ²Ohaantikiya ni namilohi Isaiya: "Kimmorumiha oholo wa mayanhupi aka, nohala wulokiherani iphiro. ³Ncu ninkhuwa ntakhwani: Nlokihe iphiro ya Apwiya, mookole mittala." ⁴Cicale, Yohani Mpatisa phooneliye ntakhwani wiira eethrucuhe opatiso wo orukunusa nrima wiira itaampi cileveleliye.

⁵Yanaamwikamela atthu othene olapo ya Yutteya, na atthu ankhala o Yerusalem, ni yanapatsisiya ni ule omooloko Yorttani, alaphaka itaampi caya. ⁶Yohani awara ikuwo yo mapururu o nkamira, eethukelaka nyununi mo nrapala, yoolya awe yari mattettentte ni urawo wo ntakhwani. ⁷Ni wowaalaka anahimya co; "Utuli waka mi nawa nkinaku rina ikuru impwaha yawaka, ni mi akimphwanela wooroma wiira kithukule miripwe co kwakwatta cawe. ⁸Mi kinawuupatisani ni maasi, nanso Ule nahala wuupatisani muNnepa Nttakattifu."

Yesu napatsiya ni nathokociya

⁹Waheranya, mahuku ale, Yesu awaaka okhuma oNasaree

yo Kalileya, mpaka opatisiya ni Yohani oYorttani.

¹⁰Wakhumawe mmaasini mmo, ahoona irimu ihuliyaka, ni Nnepa, woonya toko ikhuntta inkhuruwelaka. ¹¹Ni okhuma wirimu nineewiya ncu nnohimya: "We ori Mwana aka oophentiya, nokiphela nrima." ¹²Vahoolo Nnepa Nttakattifu wahoonrweha otakhwani, ni ¹³ahokhala wonwo mahuku arupayini, ni ahothokociya ni Sotwani; ni cahawo wonwo inama cowoopiha, ni ancelo yahonkavihera.

Owiitthuca oopacera a Yesu

¹⁴Othukiya wawe Yohani, Yesu akenle oKalileya, wahimerya atthu Nhupi Wooreera wa Nluku, eeraka:

¹⁵"Okati wahophiya ni omwene wa Nluku ori vakhiviru: Nrukunuseke nrima, nkupalelaka nhupi wooreera." ¹⁶Aviraka nceresere ipahari yo Kalileya, ahomoona Simoni ni nhimaawe Anttree avonyeraka matthavi aya mphaharini mmo, nlattu yaari mayototha ihopa. ¹⁷Yesu aheerela: "Nkitthare Mi, ni Mi kimmowupankani mayowatotha atthu." ¹⁸Ahiyaka naananoru matthavi aya, yahontthara Yesu. ¹⁹Napwahile vakani, ahomoona Yakopu, mwana a Sepetteu ni nhimaawe Yohani, alokihaka nkalawani matthavi aya pweehanaka nananoru. ²⁰Ni ale yahonhiya Sepetteu athumwanaya ni mayanteko aya, yahontthara.

Nlopwana o nnepa woonanara

²¹Yaanarwa oKafarnaum. Nihuku no Ntivela ahokela nnsinakokani, ni aheetthuciha atthu. ²²Na atthu othene yaanawumiya mwaano ni miithucihio cawe, nlattu aheetthuciha toko ntthu nolamula ni kaahiwena toko mayowantikha. ²³Ahaawo nnsinakokani mmo ntthu arina nnepa woonanara apacile okhuwa: ²⁴"We orinani ni hi, Yesu o Nasaree? Wawenle oniriha? Mi kihocuwela wiira ori Nttakattifu a Nluku." ²⁵Yesu ahoonkuphula, eeraka: "Omaale we, ni okhume wantthu ula." ²⁶Vano, nnepa woonanara,

onantathile ni ikuru, okhuwacaka, wahokhuma wantthu ule.

²⁷Othene yahotikhinaca, mpaka okohana ayayoru: "Isiyani ila? Moone meetthuciho o naanano, ni woromoliya ni nlamulo mpaka olamulela minepa coonanara ni nya cinamwiiwelela." ²⁸Ni ncina nawe nahorumanya ntetthe woorthene, ilapo yo Kalileya.

Yesu nawavoniha arettā enci

²⁹Akhumaka onsinakoka ahokela mpani mwa Simoni ni Anttree, wamoca ni Yakopu ni Yohani. ³⁰Amaathi awe Simoni yaanawerena wakorini, awerenyaka irutthu yothene, ni nananoru yahonhimerya co iretta ila. ³¹Attameryaka, Yesu ahaaverela ntata mpaka waawusa. Iretta yahaahiya, na ale yahopacera wakavihera. ³²Ococilo, ncuwa ninakwattuwile, yahomwihera ale yahoosiya ni nnepa woonanara, ³³na atthu othene o watthokoni yahothukumana wankhora.

³⁴Ahaavoniha arettā enci, yahoosiye ni coowerya, ni ahoomola minepa coonanara cinci; nanso khahiya wulumaca minepa nlattu yaanancuwela.

Yesu nahimyaca Nhupi Wooreera

³⁵Wicisuru, ohinasa ahoonwa ni ahokhuma; phurwaka nipuro nowipithya wiira aswali. ³⁶Simoni, na ale yaari ni Yesu yahontthara. ³⁷Omphwanya waya, yahomwiirela: "Atthu othene anawuphavelani." ³⁸Nanso ahaakhula: "Nirwe ncoko nkina, itthoko co vakhiviru, neethucihe wonwo, nlattu wo yela phikumenlyaka." ³⁹Ni ahorwa ilapo yothene yo Kalileya, eetthucihaka mmasinakokani, ni omolaka minepa coonanara.

Yesu ahonvoniha ntthu o makuttula

⁴⁰Ntthu o makuttula ahonrwela Yesu ni ankhromelaka ahonlepela: "Watthunaka vale onawoorya okivoniha."

⁴¹Amoonelaka ikiriri, Yesu ahonthatela ntata mpaka

onkwanya, eeraka: "Kinatthuna, ovone." ⁴²Nananoru, makuttula yahonhiya, ni irutthu yahokhala toko khalayi. ⁴³Ni Yesu ahonleha phunlakaka, ni moolumo ala: ⁴⁴"Wonna wiira ahinhimerye ntthu itthu ila. Nanso opacera orwaa wamayasataka ni ovelelihe itthu ilamuliye ni Musa; nlattu wa atthu anhapihiya makuttula, wiira akhale saahiti aa." ⁴⁵Ule, mweeco, orwa wawe ahopacera olattula ni ohimya itthu yeeranele, mpaka Yesu ohoorya okela ooniyaka mmawaani phukhalaka mapuro ale yaviravira na atthu vakani; na atthu olapo ile yananrwela.

2

Yesu ahonvoniha ntthu oowuntakyaa

¹Anavinre mahuku vakani, ni Yesu naturuwile o Kafarnaum wahorumania wiira ri owaani. ²Yahothukumana atthu enci, mpaka khayawanela wankhora, ni Yesu aheetthuciha moolumo. ³Vano yahomwiihera ntthu oowuntakyaa, akusiye na atthu acese. ⁴Okhala wiira khayoorya onkusa mpaka waryawe, nlattu wo mphwinko, yahokhunula nivatho nipuro naryawe Yesu, ni ciicale, anahunle iparo, yahokurusela nrepa naryawe ntthu oowuntakyaa. ⁵Wowoona okupali waya atthu ale, Yesu ahomwiirela ntthu oowuntakyaa: "Mwana aka, itaampi caa ciholeveleliya." ⁶Wonwo mweeco, yahonkoma mayowantikha vakani yaakaka munrimani mwaya: ⁷"Nlattuni, Ule olumacaka co? Nakufuru. Noorya tipani olevelela itaampi, hiri Nluku paahi?" ⁸Yesu, nanso acuwelaka moopuwelo aya mpaka ahaakoha: "Nlattuni mupuwelaka ciicale munrimani mwinyu?" ⁹Itthu yootepa orika phivi, omwiirela oowuntakyaa: Itaampi caa ciholeveleliya, atthuna omwiirela: Wunwe, ukuse nrepa naa ni weette? ¹⁰Vano paahi; wiira ncuwele wiira Mwanawe Pinattamu haana ikuru vathiva yolevelela itaampi,

¹¹kinawuulamula amwaacaka ntthu oowuntakyaa okuse nrepa naa ni orwe owaanya." ¹²Ntthu ule ahoonwa, ahokusa nrepa nawe ni ahokhuma ooniyaka na atthu ale othene, mpaka othene wumiya mwaano, ni yananttottopela Nluku yiiraka: "Khaninoona itthu co nikhalakaru."

Yesu namwiihana Levi

¹³Imaara ikina tho ahokhumela vate mphante wo ipharyaa; ni mphwinko wa atthu othene wahontthara, Ule eetthucihaka.

¹⁴Nanso aviraka uyo ahomoona Levi, mwanawe Alfeu nonkomile inupa yowaakheleliya nsoko, ni ahomwiirela: "We, okitthare Mi". Ni Levi ahonwa anttharaka Yesu. ¹⁵Nari wamoca, itthoko ya Levi, mayoliviha nsoko enci na atthu okosakosa yahonkomaca wameeca wamoca ni Yesu ni owiithuca awe, nlattu khayamala orunwa atthu yaantthara.

¹⁶Mayowantikha yanrumeliehana ni mafarisi, amoonaka olya na atthu ookosakosa ni mayoliviha nsoko, yaheerela owiithuca awe: "Nlattuni, naalya na atthu ookosakosa?"

¹⁷Yesu eewile cothene ahaakhula: "Kahiwena akumi phimmwavya tothoro, nanso, aretta. Mi akiwenle weehana atthu aattakattifu, nanso atthu ookosakosa."

Mwaha woothuka

¹⁸Owiithuca a Yohani ni mafarisi yaantthuka, yahowa onkoha Yesu: "Owiithuca a Yohani ni mafarisi anatthuka ni owiithuca aa ahitthukaka isiyani?" ¹⁹Yesu ahaakhula:

"Asimpwana awe mayothela anawoorya otthuka, mayothela nari na ale? Mahuku othene ankhalaya wamoca ni mayothela khanoorya otthuka. ²⁰Anahala ophiya mahuku anhalaya waakhiya mayothela, vano phankelaya otthuka. ²¹Khaawo neesera icaapha yonaanano nkuwon yo khalayi, nlattu icaapha yonaanano inatepereriha mpatta wo khalayi, ni nikhwata ninatepa wunnuwa. ²²Ni khaawo nohela ivinyu yonaanano mmapikani okhalayi, ahelaka vale, ivinyu inahala

opwesa mapika okhalayi, ni ivinyu inarihakyaa wamoca ni mapika. Nanso ivinyu yonaanano inheliya mmapikani onaanano.

Yesu ni ntivela

²³Nihuku nimoca no ntivela Yesu anavira mmamattani ni owiitthuci awe, yeettaka yahooonta ncasi. ²⁴Mafarisi yahontthara, yiiraka: "Nkoona, nlattuni ale apankaka itthu yowatelihiya opanka nihuku no ntivela?" ²⁵Ahaakhula: "Khannasoma itthu yapankilyawe Taviti, wammoonlyawe itala, ule na atthu yarinaawe?" ²⁶Wakenlyawe inupa ya Nluku, okati wa mayasataka muulupale Apiyatari, ni walilyawe mikatthe coottakattifihiya coolamuliya olya mayasataka paahi, ni ahaavaha atthu yarinaawe?" ²⁷Ni ahopwahera: "Ntivela nihopankeliya ntthu, ni kahiwena ntthu phipankeliye ntivela. ²⁸Mwanawewe Pinattamu phi mwanene ntivela."

3

Yesu ahonvoniha ntthu oonririya ntata.

¹Yesu ahokela tho nnsinakokani. Ahokhala wonwo ntthu oonririya ntata. ²Vano ale yananhottela wiira amoone ammoonihaka nihuku no ntivela wiira ankasari. ³ Yesu ahonhimerya ntthu arina ntata noonririya: "Wunwe ni owe iriyari ila va." ⁴Vahoolo ahaakoha: "Inoleveliya, nihuku no Ntivela, opanka itthu yooreera atthuna itthu yoonanara, woopolia okumi atthuna ohiya oharipweyaka?" Ale yahomaalaca. ⁵Vano, avehaka ni orusiya, ni ommweryaka nrima nlattu woturumala mirima caya, ahomwiirela ntthu:

^a Footnote

"Wookole ntata." Ahookola ntata ni nna nahovona.

⁶Wakhumilyaya, mafarisi yahothukumana na aHerotiyano wiira avaanele mamwiivel.

Mphwinko muulupale onari nceresere ipahari

⁷Yesu ahorwa opahari ni owiithuca awe, athariyaka ni mphwinko muulupale wakhuma oKalileya, ni Yutteya,
⁸oYerusalem, oItumeya, okhopela Yorttani, ni nceresere Tiro ni Sittoniya. Ahophwanyiya ni mphwinko muulupale, wewiilyaya itthu yaapankawe. ⁹Ahaahimerya owiitthuca awe, anlokihere ikalawa yaankani, wiira hiphunyererihiyi ni mphwinko. ¹⁰Woona ahaavoniha atthu enci, ni nlattu weetthu ila, ale yanawaaniya ni ikwerere wiira ankwayne. ¹¹Minepa coonanara, wamoonaaya, caanankhoromela wamiithoni wawe ni caanakhuwa: "We ori Mwana a Nluku." ¹²Ule nanso anawaateliha wiira ahicuwelihe.

Arumeyi khumi na eeli

¹³Vahooo ahowela mmwaakoni, ni aheehana ale yatthunyawe, na ale yahomwaattamerya. ¹⁴Ahaathanla khumi na eeli phwaavahaka ncina na amitthenka wiira yakhaleke ni Uyo, ni aarume, wiitthuciha, ¹⁵ni yaphwanyeke ikuru yo woomola minepa coonanara. ¹⁶Ahaathanla khumi na eeli ala: Simoni, ammahilyawe ncina na Peturu, ¹⁷Yakopu, mwanaawe Sepetteu, ni Yohani nhimaawe Yakopu, ammahilyawe ncina Powanerce, manaaya asana otari; ¹⁸Anttree, Filipe, Partimeu, Mateu, Tomee, Yakopu mwanaawe Alfeu, Tateu, Simoni Selote, ¹⁹ni Yutta Iskariyota, amwiivihile.

Yesu ni Sotwani

²⁰Waphilyaya owaami, mphwinko wa atthu wahothukumana tho, mpaka wahinoryaaya olya. ²¹Ni amawaawe, wiiyawaya itthu ila, yahokhuma wiira ammare, nlattu yeeriya: "Hoolociya." ²²Ni mayowantikha, yakhuruwenle o

Yerusalemu yahohimya: "Hovariya ni Peelsepu." Ni thotho. "Nawoomola minepa coonanara ni ikuru ca mwene a minepa coonanara."²³Vano Yesu aheehana ni wahimerya mmalikaniheroni: "Noorya cani, Sotwani omoomola Sotwani?"²⁴Omwene wakawaniyaka, omwene ule khunoorya okhala.²⁵ni inupa yakawanihiyaka, inupa ile khinoorya okhala.²⁶Phimaana, akhalaka Sotwani eecanihaka ikhotto mwanene eekawanihaka, ni khanoorya okhala tho, homala.²⁷Khaawo noorya okela inupa ya ntthu ookhomaala ni onhukhela mihakhu cawe woohipaca ommara phooryaka onhukhela vahoolo.²⁸Khweeli kinawuhimeryani: "Itaampi cothene ni ikufuru cothene cinkhala coromoliya na atthu, cothene cimmoleveleliya,²⁹nanso, ntthu nohala okufuru Nnepa Nttakattifu khammwa oleveleliyaka akhalakaru; nowookhala ni itaampi awe mahuku othene."³⁰Ahaahimerya itthu ila nlattu yahimenrye: "Ule navariya ni nnepa woonanara."

Alokwawe eekhweeli Yesu.

³¹Vano yahophiya anumwane na asihimaawe, ni anemenle otaa, yahaaruma atthu omwihana.³²Mphwinko waatthu wahonkoma ntotho wawe, atthu onhimerya waya: Ahaawo vate anumwana na asihima, anawuphavela."³³Ahaakhula: "Amanyi ni asihimaaka phapani?"³⁴Ni athetulaka miitho mwaatthu ale yanrukurenrye, aheera: "Ala pha manyi na asihimaaka.³⁵Ntthu nopanka otthuna wawe Nluku, ule phi nhimaaka, mwanrokoraka ni amanyi."

4

Nlikanihero na ntthu mayowaala

¹Ahopacera tho wiitthuciha nceresere ipahari. Mphwinko muulupale wahothukumana ntotho wawe, phimaana ahowela nkalawani ni ahoonkoma mmwe, phukhalaka mphwinko

woonene.² Anaweetthuciha citthu cinci mmalikanisheroni ni anawahimerya mmeeththucihoni mwawe: ³"Mmiriyane: Mayowaala ahokhuma arwaka owaalani. ⁴Waalaawe, ipyo ikina yahomorela nceresere iphiro ni yahowaca asanuni, yaholya. ⁵Ipyo ikina yahomorela wakokotthoni, wonwo wahakhanle itthaya yinci, khipicile omela nlattu itthaya khayakenle uttayi. ⁶Nanso, ncuwa, okhuma waya, yahopahiya, nlattu wohikhalaana itthaya yinci mitithari cahooma. ⁷Ikina yahomorela wamwiwani, ni miwa cahoona, cahomiryia ipyo ni khayeemile. ⁸Ikina yahomorela itthaya yooreera ni yunuwaka, ni inarenre, yaheema, ni wincereriya mpaka okhala talathini, sithini ni imiya khila ipyo." ⁹Ni ahopwahera eeraka: "Orina manyaru owiwelela, eeweke."

Isariya yo nlikanihero

¹⁰Nahanle vekha, atthu yanrukurerya wamoca ni owiithuca awe khumi na eeli yahonkoha manaaya nlikanihero nne. ¹¹Ahaakhula: "Nyu nhovahiya ocuwelaca isiiri yo omwene wa Nluku, nanso, atthu ari otaa citthu cothene anahimeriya ni malikanisherero, ¹²wiira yoonaka, yoone, ni ahicuwelele; yiawaka, yiwe, ni ahiiwehe wiira ahirukunuse mirima, aleveleliyaka itaampi caya.

Yesu nathapulela nlikanihero no mayowaala

¹³Ni ahopwahera: "Khanneeweha manaaya nlikanihero nna? Nnohala mweeco, wiithuca cani malikanisherero makina ayo? ¹⁴Mayowaala nawaala nuulumo, ¹⁵ari nceresere iphiro, pha ale yaleliye nuulumo. Aneewile nuulumo, sotwani nawa waatamiha nuulumo naaliye. ¹⁶Cicammo, ale yaakhenle ipyo mapuro okokoottho, pha ale yiinre aneewile nuulumo, woohipica anawaakhelela ni nrima wootteeliya, ¹⁷nanso kharina mitithari mwaale, khankhala nthiti ni yawaaka mahuviho, atthuna yomolanihaciyaka nlattu wo nuulumo,

wohipica anattitha.¹⁸ Ahaawo akina, anaakhela nuulumo mapuro o miwa. Ala anawiwa nuulumo,¹⁹ nanso nlattu woramela itthu yo ntuniyani, wothokociya ni mihakhu ni citthu cikina cinonlelaya, cinakela munrimani mwaya anattithiha nuulumo ni khaneema.²⁰ Atthu anakhela nuulumo itthaya yooreera pha ale aneewa nuulumo, anaakhelela, aneewa mpaka wiima ni wincereriya talathini, sithiini ni imiya khila ipyo.

Nthuko woomwaleela

²¹ Ahaahimerya tho: "Poti inawesiya isamaninya nhina mwaya ithuttu atthuna vathivaya nkori? Keera ineesiya waculu mmutto?²² Nlattu khhiiwo yovithiya iinhala wooneleliya, ni khhiiwo yowipithya iinhala okhumela woonene."²³ Ntthu akhalanaka manyaru owiiwelela, eeweke!"²⁴ Ni ahopwahera: "Mmiriyaneke ratta itthu ineewenyu. Nnowophimiya ni ithuttu inhalenya ophimela, ni thotho nnowowincereriya.²⁵ Vano ntthu rina, nowowincereriya, ni ntthu hirina, nowowaakhiya, mpaka citthu cirinawe.

Nlikanihero ni ipyo

²⁶ Ni anawiira: "Omwene wa Nluku ori toko ntthu avonyenre ipyo awe vathi.²⁷ Arupe, onwe, ohiyu ni uthana, ipyo inamelia ni inawunuwa, ule woohicuwela cani.²⁸ Itthaya inavaha vekhaaya, woopacera ntathi, vahoolo ncasi, ni omwiisoni ncasi nocara meelee.²⁹ Ni yowiima yattokotthaka, naahepha nlattu wahophiya okati woohephiya.

Nlikanihero ni inuku yankaani

³⁰ Vano aneera: "Ninhala olikanihera ni isiyani omwene wa Nluku? Atthuna ninhala otaphulela ni nlikaniheroni?³¹ Ori toko inuku yo nrake, ineera inaliye vathi, iri yootepa oyeva mweenuku cothene;³² nanso, yaliyakaru, inawunuwa,

inathatuwa mwiri muulupale woopwaha miri co mmattani ni inamwarya mirittha caya mpaka asanuni owiirimu woorya oteka ipuuru muntthucini mwaya." ³³Ni malikanihero menci toko ala anaweeetthuciha nuulumo, toko woonawe ciicale anawiweha. ³⁴Khoolumacera woohikhala ni malikanihero; nanso anawataphulela cothene owiitthuca awe anari vekhaaya.

Yesu nammaaliha naphuvo.

³⁵Nihuku nne, onaripenle, ahaahimerya: "Nrwe nilapuwele okhopela." ³⁶Ahiyaka miphwinko, owiithuca yahoonkusa, toko caryaawe nkalawani, ni yahommelela ikalawa cikina.

³⁷Vano ahokhumelela naphuvo muulupale ophyoo ni mawiimpi yanawicatakanihaca ni ikalawa mpaka yaahala vakani ocara maasi. ³⁸Yesu, mpatta woholo wokalawa, anarupa naphithenrye nsawu. ³⁹Yahoommusa ni umwiirela: "Mwalimu, khunoona wiira ninakumpwela?" Onwaka, aholamulela iphyoo ni aheerela ipahari: "Imaale, ihittinke!" Iphyoo yahomaala, ni ipahari yothene yaheera riya-riya.

⁴⁰Vahooo ahaahimerya: Nlattuni nkhalaka atthu owoova osilili? Nhikupaliki?" ⁴¹Yanawoova venci ni yanahimeryana: "Tipani Yoola? Hata iphyoo, ni ipahari cinamwiwelela?"

5

Yesu ahonvoniha ntthu ovariya ni minepa

¹Yahophiya nikhopela nikhwaya no'pahari, ilapo yo Yeraseno. ²Yesu nalapuwile ahosiceriya ni ntthu aakhuma omahiye, avariye ni nnepa woonanara. ³Akhala omahiye, ni khaawo oorya ommara, mena vakani ontthuka ni unyolo,

⁴nlattu imaara cinci ahotthukiya ni unyolo mpaka wuntakaca unyolo ni onyakataca ikatiyato; khaawo oorya ommoniha. ⁵Mahuku othene anawetta, othana ni uhiyu mmarekhano ni mmyaakoni, akhuwaka ni eerakalihaka ni maluku.

⁶Amoonaka Yesu uttayi, ahotthimakaca ni ahoonkhoromela ni ⁷ahokhuwa ni ncu nowirunya: "We orinani ni miyano, Yesu Mwana a Nluku. Ohikoopopihe!" ⁸Ni khweeli, Yesu anaamwiirela: "Okhume mwantthuni mu, nnepa woohiloka." ⁹Vaholo ahoonkoha: "Ncina naa tipani?" Ahaakhula: "Mphwinko phi ncina naka, nlattu niri enci." ¹⁰Ni yahonlepela ankhanyererihaka wiira ahomoliye ntetthe ule. ¹¹Caanalya vano ikuluwe nceresere mwaako, ¹²ni minepa coonianara cahonlepela Yesu: "Onilamulele nakele nkuluweni mmwe." ¹³Yesu ahorumelela, ni nenna nna minepa coonianara cahokhuma wantthuni ni cahokela nkuluweni, ni nikphoto nne nari toko ikuluwe elufu piili naheevonyera mpaharini ni nahottitha. ¹⁴Ahakheli yahotthawa ni yahovira alattulaka mmawaani; na atthu enci yahowa woona itthu yeeranele. ¹⁵Waphiyaya nipuro naryawe Yesu, yahomoona ntthu avariye ni minepa coonianara noonkomile, nawanre ni nakhanle ntthu ule avariye ni mphwinko, ni yahoova. ¹⁶Asaahiti a itthu tthu oovariya ni minepa coonianara ni itthu yeranele ni ikuluwe. ¹⁷Vano yahoonlepela Yesu wiira athame ilapo aya. ¹⁸Yesu ahoturuwela okalawani; ni ntthu avariye ni minepa ¹⁹Yesu khanthunihenre, nanso ahomwiirela: "Orwe owaanyaa wamawaa ni wattonkacere citthu cothene cupankenlyaya Apwiya, ni toko ciwoonenlyaya ikiriri." ²⁰Ahokhuma wonwo, ni ahopacera oTekapoli itthu yampankenlyawe Yesu, na atthu othene yahotikhinaca.

Olepela wa athumwane ntthu

²¹Yesu nalapuwile mpaharini ni ikalawa, ni neemenle nceresere ipahari wahothukumana mphwinko muulupale wa atthu. ²²Ahophiya vano muulupale onsinakoka, eehaniya Cayro, ni omoona wawe Yesu, ahoonkhoromela, ²³ni ahoonlepela ankhanyererihaka: "Mwana aka mwanthiyana hanle vakani okhwa; uwe untathele matata akhale nkumi."

Ovonihiya wa nretta

²⁴Yesu ahoommelela phuthariyaka ni mphwinko muulupale wamphunyereriha. ²⁵Vano, nthiyana mmoca awuva iphome iyakha khumi na piili, ²⁶ni ahuvisha venci mmatatani mwaya mayoovoniha enci, ni arihile mihakhu cawe cothene, nanso woohiphwanya nafasi, hata iretta awe yaanavira etepacaka. ²⁷Neewile ca Yesu, ahotakaneela ni mphwinko, ni awaaka ottuli wawe ahoonkwanya nihancu nawe; ²⁸aheecirela mweeco: "Mena kakwanyaru cowara cawe, kimmovona." ²⁹Nananoru iphome yaheemela, ni ahoona mwirutthuni mwawe wiira ikwerere aka ihowona. ³⁰Nenna nna, Yesu, oonaka wiira ikuru awe yahokhuma mwirutthuni mwawe, ahokurunuwela mphwinko akohaka: "Kikwanyile ti pani?" ³¹Owiithuca awe yahomwiirela: "Onawoona wiira miphwinko cinawuphunyereriha mipatta cothene, ni onaakoha: "Akikwanyile ti pani?" ³²Nanso Yesu ahoweha nceresere aphavelaka omoona ntthu apankile itthu ila. ³³Vano nthiyana ahocuwela ciheeranya mwirutthuni mwawe oovaka ni athukumelaka ahokhuma ahoonkhoromela Yesu ni ahoonhimerya citthu cothene. ³⁴"Mwana aka, okupali waa ohwoopola. Urwe ni imani ni uvone ikwerere aa.

Wunweleliya wa mwanawe Cairo

³⁵Yesu olumacaka ninlelo yahowa atthu akina akhumaka inupa awe muulupale onsinakoka phwiiraka: Mwana ahokhwa. ³⁶Yesu, nanso, neewile moolumo ale, ahomwiirela muulupale o nsinakoka: "Ohituthuwe, okupaliki paahi." ³⁷Ahaateliha othene wiira: Hikivelele ntthu, hikhanle Peturu, Yakopu ni Yohani, nhimaawe Yakopu. ³⁸Ophiya waya owaanyawe muulupale o nsinakoka, Yesu aheewa ikuttho yuulupale ya atthu enci yunlaka mpani. ³⁹Ni akelaka, ahaahimerya: Ikuttho ila wunla nwe isiyani? Mwana uyo kakhwile, narupa paahi." ⁴⁰Nanso atthu ale yanannya, Yesu

ahaakumihera otaa atthu ale othene ni aakusaka athumwane ni anumwane, na ale yammelenle, yahokela mpani mwataleliye mwanamwane.⁴¹ Ni ammaraka ntata, aheera: "Mwana aka kinawulamulela, wunwe."⁴² Nananoru mwanamwane ahoonwa ni ahopacera weetta, ari mweeco, ni iyaakha khumi na piili. Othene yahoooma mwaano.⁴³ Yesu ahaalepela wiira itthu ile ihicuweliye ni ntthu, ni aholamula ovahiya yolya mwanthiyana.

6

Yesu nakhottiya wakheleliya oNasaree

¹ Okhuma wawe wenwe, ahorwa wamoca ni owiithuca awe. ² Nihuku no ntivela ahopacera wiitthuciha nnsinakoka na atthu enci yamwiwiwa, wanawooma mwaano ni yanahimya: "Inonkhuma vayi itthu ila ni ocuwelani uno ovahiyawe uno? Cinopanka cani cotikhineeha nya ni ntata nawe?" ³ Kahi nkarapintero, mwanawewe Mariya, ni nhimaawe Yakopu, Yosefi, Yutta ni Simoni? Ni asirokorawe khari ni hi?" Yahoviruwaca. ⁴ Yesu aheerela: "Namilohi notarawiya owaanyawe paahi, waama wawe ni wapuwani wawe." ⁵ Ni wonwo khoonrye opanka cotikhineeha hata mena. Ahaavooniha aretta vakani paahi, athatelaka matata. ⁶ Ahotikhinaca ohikupali waatthu ale. Vano ahoviravira ithoko co wattamana eetthucihaka wonwo.

Amitthenka anarumiya

⁷ Aheehana khumi na eeli, ni ahopacera waruma eeli eeli, ni ahaavaha ikuru yolamulela minepa coonanara. ⁸ Ahalamulela wiira ahikuse itthu munkwahani ari ihinokhala ikopo paahi. Wala nkatthe, wala nrupa, mena nsurukhu nyununi. ⁹ Aware ikwakwata ni ahiwyе ihancu piili. ¹⁰ Ni ahaahimerya tho: Mwakelaka inupa, nkhale wonwo mpaka wunwa nipuro nno. ¹¹ Ni mwahaakheleliyeke nipuro nno, na

atthu ale yahiwiwekeni, woothama vale, nkukuthe ntthupi no manyaa enyu, wiira ikhale itthu inthoonyera mirima caya atthu ale.¹² Amitthenka yahorwaa ni yahaalaka atthu otharuwela itaampi.¹³ Yahoomola minepa coonanara cinci, yahatikithela ni makhura aretta enci mpaka waavoniha.

Okhwa wawe Yohani Mpatisa

¹⁴Mwene Heroti aheewa culumaceriyaka ca Yesu, nanruma ncina nawe ni anawiira: "Ula phi Yohani Mpatisa onwelenle mwaatthu okhwa, phimaana cinawithoonyera mwa ule ikuru coopanka cotikhineeha."¹⁵ Akina yanawiira: "Phi Eliya" akina yanalipihera: "Ri namilohi sawa toko anamilohi akina."¹⁶ Heroti nanso, wowiwa itthu ila anahimya eeraka: "Yohani onthikinlyaka isiko phunwelenle."¹⁷ Khweeli, Heroti phalamunle otthukiya Yohani ni weesiya nkalaposo, nlattu wa Herotiyatta, amwaarawe Filipe nhimaawe, anthenlyawe.¹⁸ Nlattu Yohani anamwiirela Heroti: "Khunleveliya okhalana amwaara a nhimaa.¹⁹ Herotiyatta hopophela nreca ni anathuna omwiiva, nanso khoorya,²⁰ nlattu Heroti anamoova Yohani ni, acuwelaka wiira ari ntthu ooloka ni ntakattifu, anamwaakhiha; wamwiwawe anasanka, nanso anammiriyana ni uciveliya.²¹ Nanso nahophiya nihuku nooreera, Heroti wopuwelenlyawe nihuku nayariyawe ahophavela yolya yinci yowaavaha oolupale o wahano, oolupale anakhotto, ni mamwene o Kalileya.²² Nakenle wiina mwana nthiyana a Herotiyatta wahoncivela Heroti na atthu yaalattuliye. Mwene ahomwiirela mwali: "Okilepele itthu phi itthu intthunaa ni mi kimmowuvaha."²³ Ni ahopwahera: "Kimmowuvaha itthu yothene inhalaa okilepela hata okhalaka mwanusu omwene aka."²⁴ Mwali ahokhuma wakoha anumwane wiira: "Kilepele isiyani?" Ala ahaakhula: "Muru wa Yohani Mpatisa."²⁵ Mwali akelaka tho nenna nna, ahonlepela mwene, eeraka: "Kintthuna ovahiya

nananoru, onaheliye muntiisini muru wa Yohani Mpatisa."

²⁶Mwene ahotuthuwa, nanso nlattu woolupela wawe ni, nlattu waatthu yaalatuliye, khathunne onthuwa. ²⁷Nenna nna ahonlamulela mayorontta owiha muru wa Yohani.

Mayorontta ahorwaa nkalaposo ni ahothikila isiko ya Yohani, ²⁸ni vahoolo ahowiha muru muntiisini mpaka ommaha mwali, ni ula ahaavaha anumwane. ²⁹Anacuwenle itthu ila owiitthuca a Yohani ni ahonthipela mmahiyeni.

Mikatthe cinawucereriya

³⁰Amitthenka yahothukumana wa Yesu ni yahontonkacera citthu cothene capankilyaya ni citthu cihilyaya. ³¹Ni Yesu ahaahimerya: "Mmweeke, nirwe nipuro nowipithya ni mmumule vakani: nlattu yaari enci yaarwa ni yaawa mpaka ohikhala okati woolya. ³²Vano yahorwaa ni ikalawa nipuro nowipithya nahaarivo hata ntthu. ³³Yoonaka arwaka, enci yahocuwela okitthu onkelaya. Ni mmatthokoni mothene yahorwaa, yeetaka vathi, nipuro nne, ni yahophiya nraci.

³⁴Wakhuruwawe nkalawani, Yesu ahoona mphwinko muulupale ni ahoonela ikiriri, nlattu yaari toko ikhontwaa cohikhala nhaakheli. Vano ahopacera weetthuciha okati mwinci. ³⁵Ncuwa wakelaya otthekuwa, owiitthuca awe yahomwatamerya ni onhimerya: "Nipuro nna niri toko mwini, ni ncuwa notthekuwa. ³⁶Walamulele orwaa mmawaani ni mmatthokoni cowatamana wiira yathume yolya." ³⁷Ahaakhula: "Mwaavahe nyenyu wa yolya." Na ale yahonhimerya: "Wothuma mikatthe cowavaha atthu ale othene, nimphavela ncuruku emiya piili." ³⁸Yesu ahopwahera: "Nhaana mikatthe mikavi? Nrwe moone."

Anakohile atthu, yahaakhula: "Mikatthe mithanu ni ihopa piili." ³⁹Ahaalamulela wonkomicha atthu vakani khila nipuro mmalasini makithi. ⁴⁰Ni yanawunkoma khila ipuwa atthu emiya ni ipuwa ikhwawe atthu hansini. ⁴¹Vano ahokusa

mikatthe mithanu ni ihopa piili ni, aweehaka wiirimu, ahosukurela. Ahomyaniha mikatthe ni ahaavaha owiitthuca awe wiira yakawele atthu. Ni ahaakawela ihopa piili,⁴²na atthu ale yaholya mpaka ovona.⁴³Ni ahocariha tho itthuttu khumi na piili ikalakattela cahanle co mikatthe ni co'hopa.⁴⁴Vano yalilyayo mikatthe nye yaari atthu elufu thanu.

Yesu naweetta waculu wamaasini

⁴⁵Nananoru ahakhanyereriha owiitthuca awe okela nkalawani ni olapuwela nikhopela nikhwawe no Petsayita; mwanene alaseraka mphwinko.⁴⁶Analasenre mphwinko ule, ahowela omwakoni, oswali.⁴⁷Wiila waya, ikalawa yari iriyari ipahari, ni Yesu aheemela nceresere vekhawe.

⁴⁸Wonna wawe wiira yahoocya weettiha ikalawa nlattu iphyoo yanavirikana, aheekamela weeraka mapikoosa, eettaka wamaasini mpaka otthuna ohapuwa.⁴⁹Nanso owiitthuca yamoonaka weetta wamaasini yahopuwela wiira nnepa, ni yahokhuwa.⁵⁰Othene mweeco yahomoona ni yahotuthuwa. Mwanene nanso aholumacera, eeraka: "Mpise nrima, phi mi, nhoove!"⁵¹Vahoolo, ahokela nkalawani wariyaya, ni iphyoo yahowukuwa. Othene yanawoova venci.⁵²Khayeewehile ni nlelo itthu yeranele ni mikatthe nye nlattu woolipa mirima caya.

Yesu nawavoniha aretta oYenesare

⁵³Analapuwenle okhopela, ahophiya ilapo yo Yenesare ni ahovonyera vathi nankura.⁵⁴Anakhumile nkalawani, atthu owonwo yaahoncuwela.⁵⁵Yahophiya atthu enci olapo ile ni yahopacera wawiha aretta mmarepani ni aharweha nipuro nacuwenlyaya wiira phiryawe.⁵⁶Mmatthokoni makani, itthoko cuulupale ni mmawaani, nipuro phi nipuro nakelawe yanaweesiya aretta mparaparani ni yahooonlepela wiira aleve

mena okwanyiya nlempo no nhancu awe. Na atthu othene yankwanya yanavona.

7

Coohiyerana co Mahumu

¹Mayowantikha ni mafarisi akina, akhumaka o Yerusalem, yahothukumana ntotho wawe Yesu. ²Yahoona wiira owiitthuca awe akina yanalya nkatthe ni matata oohirya, manaaya woohinyawa. ³Mafarisi ni Ayutteu othene khanlya woohinyawa ratta ratta, toko calemalenlyaya atthu okhalayi. ⁴Waturuwaya oparasa, khayalya ihinaya onyawa; ni cihaawo tho citthu cinci cikina cimpankaya attharaka citthu cokhalayi, toko orapiha ikahi, myaapu, ni myaapu co ncukhuma ni mikori. ⁵Yahonkoha vano, mafarisi ni mayowantikha: "Owiitthuca aa ahiwelelaka citthu cokhalayi, alyaka ahinyawile, isiyani?" ⁶Yesu ahaakhula: "Hohimya ratta namilohi Isaaya, awacakani nyu, atthu o mirima miili, toko cantikhiyaya: "Mphwinko ula onakitithimiha ni mattere, nanso nrima aya onkhala uttayi waka. ⁷Anakilapela vathiru, ni yeetthucihaka malamulo a atthu paahi. ⁸Ahiyaka nlamulo na Nluku, phuttharaka coohiyerana ca atthu, toko orapiha myaapu ni ikahi ni citthu cinci colikana nnya." ⁹Ni aheerela: "Nnahiya ntteeliyaka nlamulo na Nluku wiira nthareke coohiyerana cinyu."

¹⁰Mussa, mweeco, heera: "Wathitimihé athumwana ni anumwana. Ni ntthu nohala walapha athumwane ni anumwane attarusiye ni eeviye." ¹¹Nyu nanso nneera: "Ntthu nohala wahimerya athumwane athhuna anumwane: "Itthu yahalaka wuvahani nyuva phi ila 'korpan' manaaya, itthu yovahiya Apwiya. ¹²Cicammo khanonhiyera ntthu itthu yowapankela athumwane athhuna anumwane, ¹³mmalihaka cicammo nuulumo na Nluku nlattu wo

coohiyerana cokhalayi cinvahenyu. Ni nnapanka citthu cinci toko nnya."

Cinapankiha atthu okhala aharamu

¹⁴Eehanaka tho mphwinko, Yesu anahimerya: "Nkiviriyane othene, ni mwavye wiiweha. ¹⁵Khiwo iri otaa wawe ntthu, ineera inakenle nhina mwawe, phoorya ontatusa iharamu; nanso inkuma munthuni, ila phinoorya ontatusa iharamu. ¹⁶Ntthu orina manyaru owiwelela, eewe!" ¹⁷Wakenlyawe mpaani, nahile mphwinko, owiitthuca awe yahonkoha manaaya nlikanihero nna.

¹⁸Ahaakhula: "Nyu ciicammo khaneeweha? Khanocuwela wiira, citthu cothene co otaa cinkela munthuni, khacinoorya ontatusa iharamu, ¹⁹nlattu khinkela munrimani, nanso nnapiipwini mwawe, ni vahoolo inakhumela wanipuroni waya? Ciicale anahimya wiira colya cothene cooreera." ²⁰Ni ahohimya tho: "Itthu inkuma munthuni, yeo phinontatusa iharamu. ²¹Nlattu nhina nrima wantthu phinkhumaya moopuwelo oonanara: olavalava, wiinya, wiiva, ²²oraruwa, isoyo, wunlela coonanara, othepya, ohilemeliha irutthu, orama, okufuru, wiicona, ohiwacera itthu yoomaana. ²³Citthu nnye cothene coonanara cinkhuma nhina, ni cinantatusa ntthu nharamu.

Nthiyana Nkananey

²⁴Akhoolaka nipuro nne, ahorwa nttetthe wo Tiro ni wo Sittoniya. Ahokela mpani ni khatthuna wiira acuweliye ni ntthu, nanso khoonrye wipitha. ²⁵Vano wohipica nthiyana arina mwanawе mwanthiyana avariye ni nnepa woonanara weewilyawe wulumaciya ca Yesu, ahowa onkhoromela wamettoni wawe. ²⁶Ari nthiyana nsenci, olapo yo Siriya-Fenisiya, ni ananlepela wiira omoomole ncini wa mwanawе. ²⁷Ahaakhula: "Warerihe, toko, avone opacera asana; woona khavanreera okusa nkatthe wa asana ni

warihela asilapwa!" ²⁸Ale mweeco, ahaakhula: "Khweeli, Pwiya, nanso hata asilapwa analya vathivaya meeca colya ca asana cimmora-mora." ²⁹Yesu ahomwiirela: "Nlattu wo nuulumo nna, orweke, ncini nookhuma mwa mwanaaa."
³⁰Ahoturuwela owaani ni ahomphwanya mwamhima nonkomile wakorini. Ncini nahonhiya.

Ntthu oohiiwa ni oohulumaca navonihiya

³¹Nakhumile tho ntetthe wo Tiro, ahowela o Sittoniya, mpaka ipahari yo Kalileya, aphulanihaka ntetthe wo Kapole. ³²Yahomwihera ntthu ohiwa, ni wanrikarikela wulumaca, ni yahonlepela wiira anthatele ntata. ³³Yesu antamihaka waatthuni ahonhela makokho mmaprungi ahonsuwela ni ukwanya nlimi ni isene. ³⁴Ni awusaka miitho wirimu ahohihimerya, eeraka: "Effatha" manaya "wiihule."
³⁵Maaru yahonhulya namarweele, nlimi nawe nahontthukuwa ni ahopacera wulumma ratta. ³⁶Yesu aheera wiira hinhimerye ntthu itthu yeraneele, nanso waatepawe waateliha, phaatapaaya omwarusela. ³⁷Atikhinacaka, yaanawiira: "Cothene nopanka cotikhineeha, heewiha atthu ohiwa, ni wulumaciha atthu ohulumaca."

8

Mikatthe cinawincereriya imaara yonapiili

¹Mahuku ale, okhala wiira wahotthukumana tho mphwinko muulupale na atthu khayarina yolya, Yesu aheehana owiitthuca awe ni ahaahimerya: ²"Okiiriha ihaaya mphwinko ula. Nna va ahovira mahuku mararu anari ni mi ni kharina yolya. ³Kaalaseraka cicale woohilyetthu, wiira arwe mmwanyaya anahala okhwa mahile ni iphiro, kontha akina akhumile uttayi." ⁴Owiitthuca awe yahomwaakhula: "Nohala woorya cani ntthu waaliha nkatthe, watakhwani va? ⁵Nanso ahaakoha: "Nrina mikatthe mikavi?"

Yahaakhula: "Mithanu na miili." ⁶Aholamula wiira atthu yunkome vathi. Ni, akusaka mikatthe mithanu na miili, ahoreeriha, ahomyaniha ni ahaavaha owiitthuca awe, wiira yakawele na ale yahaakawela atthu. ⁷Yahaana tho asihopa vakani. Ahoreeriha ni aholamula wiira yaakawele. ⁸Yaholya mpaka orupala, ni ikalakathela cahanle nyo owiitthuca awe yahottottela ithutu thanu na piili. ⁹Atthu ale yaari ilufu cese. Vahooolo ahaalasera. ¹⁰Ni awelaka vano nkalawani ni owiitthuca awe, ahorwaa mittetthe co Talmanuta.

Mafarisi anallepela ikanyero

¹¹Yahowa mafarisi yapacenre onyakulihana ni Yesu ni woontteha yahoonlepela ikanyero yo wiirimu. ¹²Yesu ahihimeryaka ni nrima wothene, aheera: "Nlattuni nihimo nna ninalepelela ikanyero isiyani? Khweeli kinawuhimeryani wiira nihimo nna khaninhala ovahiya ikanyero hata vakani." ¹³Ni aahiyaka, ahokela nkalawani, mpaka olapuwela ikhopela ikina.

Miropo co mafarisi ni ca Heroti

¹⁴Owiitthuca yaholiyala owya mikatthe, ni nkalawani khayaarina tho waari nkatthe mmoca paahi. ¹⁵Yesu aheerela: "Moone, nkhale miitho mmwehaka ratta miropo co mafarisi ni miropo ca Heroti." ¹⁶Na ale yahopacera ovanyihana, yopuwelaka wiira waaciye ohikhalana nkatthe. ¹⁷Yesu nanso, weewilyawe moolumo ale, ahaahimerya: "Nlattu isiyani moopelaka mwaha o itthu yohikhalana nkatthe? Nanlelo khannahelelela ni khanneeweha? Nri ni nrima woturumala. ¹⁸Nhana miitho ni khannoona? Nhana manyaru nanso kanneewa ni khannopuwela. ¹⁹Ithutu kavi coocara ni coohala caattottenlenyu, wamyanihilyaka mikatthe mithanu kaakawelaka atthu ilufu thanu? Yahaakhula: "Khumi na piili." ²⁰Ni wamyanihilyaka mikatthe mithanu na miili pwaavahaka atthu ilufu cese, mwacarihile ithutu kavi cokalakkattela co nkatthe?"

Yahakhula, "Saapa." ²¹Ni anaweerela: "Nanlelo khanneewa?"

Ntthu ohoona navonihiya

²²Yesu ni owiitthuca awe yahophiya o Petsayita ni yahomwihera ntthu ohoona, anlepelaka wiira ankwanye. ²³Ahommarela ntata ntthu ohoona ni ahonrweha nceresere itthoko, ahonhela isenye mmithoni mwawe, ahonthatela matata ni onkoha: "Onawoonaka ithu?" ²⁴Ule ahoteesa miitho ni aheerela: "Kinawoona atthu, yeettaka ankhala toko miri." ²⁵Ahonthatela tho matata mmiithoni, ni ule ahopacera wooma oparapara, ni ahovona, oonaka rattaratta uttayi ni oparapara citthu cothene. ²⁶Yesu vano ahoonlamulela orwa owaani, ni ahomwiirela: "Ohikele mena omawaani."

Petru nanrumelela Yesu Mwana a Nluku

²⁷Yesu ahonwa ni owiitthuca awe, akelaka omawaani co Sesareya wo Filipe. Mphironi ahaakoha owiitthuca awe, eeraka: "Atthu ayo aneera wiira Mi kipani?"

²⁸Yahomwiirela: "Yohani Mpatisa, akina Eliya, ni akina tho aneera wiira ori mmoca mwanamilohi." ²⁹Ni ahaakoha: " Ni nyu nneera Mi kipani?" Petru ahaakhula: "We ori Kristu."

³⁰Ahaalamulela vano, wiira ahinhimerye ntthu ithu ila.

Yesu nahimya imaara yoopacera wiira nahala ohuvihya ni wiiviya

³¹Vahoolo ahopacera weethuciha wiira Mwanawwe Pinattamu nahala ohuva venci ni okhotiya ni mahumu, ni oolupale a mayasataka, ni mayowantikha, mpaka wiiviya ni wunwelela anavinre mahuku mararu; ³²ni anawahimerya ithu ila wohakhuwa-khuwa. Petru ahomwihana Yesu ni ahopacera onkuphula. ³³Yesu nanso arukunuwaka, ni avehaka owiitthuca ahoonkhuphula Petru, eeraka:

"Othame wiitho aka, Sotwani, woona khummwacera citthu ca Nluku, nanso paahi citthu ca atthu." ³⁴Eehanaka mphwinko wa atthu wamoca ni owiitthuca awe, aheerela: "Ntthu, athunaka okitthara, eerune mwanene, akuse nsalapa awe ni akitthare. ³⁵Nlattu, ntthu nohala ophavela woopola okumi awe onanrihya, ni onhala onrihya nlattu wo miyano, ni nlattu wo Nhupi Wooreera nowowopola. ³⁶Enhala okhuma isiyani, ntthu ophwanya ittuniya yothene ni arihaka nnepa awe? ³⁷Atthuna ntthu nohala ovaha isiyani wo wakakhaniha nnepa awe? ³⁸Ntthu mweeco nohala wuliya muru nlattu wo Miyano ni nlattu wo moolumo aka va mithoni va nloko nna nookosakosa nimwalaanne ni Mi, cicammo, Mwanawe Pinattamu nahala wuliya muru nlattu wa ale aphiyaka o nnemani wa Athumwane wamoca ni Ancelo attakattifu."

9

Yesu neeconeeha toko Nluku

¹Yesu ahaahimerya tho: Khweeli kinawuhimeryani wiira akina mwaala ari vava khanhala okhwa ahinaya woona omwene wa Nluku owaka ni ikuru caya.

Wiitatusa wa Yesu

²Anavinre mahuku mathanu na moca, Yesu ahaakusa Peturu, Yakopu ni Yohani, ni ahaaweliha vekhaaya, mwaako woorekama. Ni aheetatusa wamiithoni waya.

³Coowara cawe cahothatuwa coowarya, cootteela usilili toko khaawo mayokatha vathiva owoorya otteeliha ciicale.

⁴Ahaakhumelela Eliya wamoca ni Musa ni ooyeli yanawulumaca ni Yesu. ⁵Peturu ahomwiirela Yesu: Mwalimu oreera okhala vava, niteke marapattha mararu, nimoca na waa, nikina na Musa nikhwawe na Eliya.

⁶Kontha khayacuwela itthu yaahimyaawe nlattu yanawoova

venci.⁷ Ni nahokhuruwa nihutte naakhunenle ni ntthuuci, ni nahokhuma ncu nnihutteni neera: Ula mwanaka ophentiya. Yoyo mwiiwe.⁸ Nenna nna, awehaka, khayamonne tho ntthu, ari Yesu vekhawe.⁹ Wakhuruwaya mmwakoni, Yesu ahaalamulela wiira ahihimerye ntthu itthu yoonyaya, mpaka vahoolo Mwanawe Pinattamu nonwelenle mwaatthu ookhwa.¹⁰ Ale yahotthara moolumo ale, nanso yanakohana ayayoru manaaya: Wunwelela mwaatthu ookhwa.¹¹ Ni yahonkoha yiiraka: "Mayowantikha aneerelani wiira woopacera Eliya phinhala owa?"¹² Ahaakhula: "Aye, Eliya, awaaka woopacera nahala weesa wanipuroni waya citthu cothene, nanso yantikhiye isiyani ya Mwanawe Pinattamu, wiira nalamuliya ohuva venci, ni onyoholiya.¹³ Ni mi mweeco kinawuhimeryani: Eliya ahowa, ni yahompankela cothene catthunaya, toko cantikhiye."

Yesu ahonvoniha ntthu owerenya icilicili

¹⁴Naphile waryaya owiithuca awe ahoona mphwinko muulupale wa atthu warukurenrye ayoca, ni mayowantikha anyakulihanaka na ale.¹⁵ Amoonakaru Yesu yahotikhina ni yahothimakaca onkoha isalama.¹⁶ Ni ule ahaakoha ale: "Nnonyakulihanani?"¹⁷ Ntthu mmoca mwa mphwinko ule, ahomwiirela: "Mwalimu, kihooowihera mwanaka, rina nnepa woohulumaca.¹⁸ Wammaraka vale, unamvonyera vathi ni ule napacera okhuma niphoru, ocekesa miino ni phuumaka teyeye. Kihaalepela owiithuca aa wiira yomole ncini, nanso khayoonrye.¹⁹ Yesu aheerela: "Nyu, nloko noohikupali, kinhala okhala ni nyu mpaka yakhani? Kinhalu wuvilelani mpaka yakhani? Nkiwihere woono."²⁰ Yahommwihera. Nimoonakaru Yesu, ncini nahompukunya mwanhima ni ikuru, mpaka ommanela vathi, ni ahopacera ophirikya akhumaka niphoru mwano.²¹ Yesu ahaakoha athumwane: "Itthu ile inomwirya ikhumelo yakhani. Na ale ahaakhula: "Ikhumelo mwanamwane,²² ni imaara cinci nahommonyera

wamoroni ni mmasini wiira amwiive, nanso wooryaka vale opanka itthu, onoonele ikiriri, ni onikhavihere." ²³Yesu ahomwiirela: "Wooryaka! Ntthu nokupali citthu cothene cinawooryanya." ²⁴Nenna nna, athumwane mwana oyo yahokhuwa: "Kinakupali; nkikavihere ohikupali waka!"

²⁵Yesu, oonaka wiira atthu enci yanawa, aholamulela nnepa wonanara ni aheerela: "Nnepa wohulumaca ni wohiwa, Mi kinawulamulela, okhume wamwana ula, ni ohinturuwele tho." ²⁶Ni nnepa, okhuwaka ni wicipulacaka ni ikuru, wahokhuma. Mwanhima ahokhala toko ookhwa, mpaka atthu enci wiira hokhwa. ²⁷Nanso, ammaraka ntata, Yesu ahommusa, ni ule aheemela. ²⁸Okelawawe mpani, owiithuca yahonkoka vekhawe: "Nlatuni hiyano khanoonrye woomola?" ²⁹"Ahaakhula: "Nloko nna ninoomoliya ni iswali ni utthuka paahi."

Yesu nahimya imaara yonapili ohuva ni ukhwa wawe

³⁰Akhumaka wonwo yahottupulaniha ilapo yo Kalileya, ni Yesu khatthuna wiira acuweliye ni ntthu, ³¹nlattu anavira eetthucihaka owiithuca awe ni anaweerela: "Mwanawе Pinattamu nahala orwehiya mmatatani mwaatthu anhala omwiiva, nanso, nakhwile nowowunwelela anavinre mahuku mararu." ³²Nanso ayo khayeweehile nuulumo nne, ni yanamoova onkoha.

Ti pani nohala okhala muulupale cinene?

³³Yahophiya oKafarnaum, ni, anari owaani, Yesu ahaakoha: "Mwavanyihanani mphironi?" ³⁴Yahomaalaca, nlattu yanavanyihana ayayoru, wiira tipani ri muulupale mwaale. ³⁵Onkomaka, Yesu aheehana owiithuca awe khumi na eeli ni ahaahimerya: "Ntthu aphavelaka okhala muulupale, eepanke mwankani mwaatthu, ni akhale nrumeyi a atthu othene." ³⁶Ni ankusaka mwanamwane, ahomweesa iriyari aya, ahommarela ni aheerela: ³⁷"Ntthu

nomwakhela mwanamwane toko ula mwancina naka, nokaakhela Miyano, ni ntthu nokaakhela Mi, khankakhela Mi, nanso Ule kirumile."

Ntthu hinoniina, nawiraana ni hi.

³⁸Yohani ahonhimerya: "Mwalimu, nihomoona ntthu oomolaka macini mwancina naa, ni ntthu ule khannitthara, ni nihomwaateliha." ³⁹Yesu ahaahimerya: "Nhimwaatelihe, nlattu khaawo nopanka cotikhineeha mwancina naka phukaapa mi nenna nna." ⁴⁰Ntthu hinoniina, nawiraana ni hi. ⁴¹Ntthu novahani ikoopu yo maasi wiira mmurye nlattu wokhala owiiththa awe Kristu, khweeli, kinawuhimeryani, khankela ahalelaka itthuvo awe mena vakani."

Cookosiha

⁴²"Ntthu nohala onkosiha mmoca mwaasinamwane ala ankikupali Mi, phatari atthukeleliye nsikomo nsilo nnosileliya ni avonyeriye mpaharini. ⁴³Ntata naa nookosihaka, othikile. Onareera okela wokumini ni ntata noopahuwa, wahohiyana okhalana matata oomeli ni orwa omoroni ohinttiphya. ⁴⁴Wonwo ohinkhwa asunku, ni moro khunttiphya. ⁴⁵Nnya naa nookosihaka, othikile. Onareera okela wokumini onapahuwile, wahohiyana okhalana omeli ovonyeriyaka omoroni. ⁴⁶Wonwo ohinkhwa asunku, ni moro khunttiphya. ⁴⁷Ni niitho naa nookosihaka, ophele. Onareera okela omweneni wa Nluku ni niitho nimoca, wahohiyana okhalana omeli ovonyeriyaka omoroni. ⁴⁸Wonwo ohinkhwa asunku, ni moro khunttiphya. ⁴⁹Phimana khula ntthu nahala olukiya ni moro. ⁵⁰Maakha phi itthu yooreera; nanso yathatuwaka oririya, ammolukiya ni isiyani? Nkhalanek maakha mwanyu ni mweetteke ni mpuha ntthu ni nkhwawe.

Othelana khumwalaaniya

¹Nakhumile wonwo, ahokela nttetthe wo Yutteya ni okhopela mooloko Yorttani, ni mphwinko onathukumanne tho nipuro naryawe, anaweeethuciha tho, toko calemalenlyawe.

²Yahomwatamerya mafarisi ni yahonkoha antehaka: "Iri yooreera nlopwana wamwalaana amwaarawe?" ³Ahaakhula: "Musa holamulenleni isiyani?" ⁴Yahomwaakhula: "Musa holevela wavaha iwarakha yoomwalaana, ni wahiya." ⁵Yesu ahaakhula tho: "Nlattu woolipa winyu nrima phuvahilyaweni nlamulo nno. ⁶Nanso, wupattusoni wolapo, 'Nluku ahompanka nlopwana ni nthiyana. ⁷Phimana, nlopwana nahala wahiya athumwane ni anumwane ni nokookhala na amwaarawe. ⁸Ni ooyeli ankookhala irutthu imoca. Phimana, khankhala tho eeli, nanso irutthu imoca.' ⁹Vano, yolutanihiya ni Nluku, khimwalaanihiya ni ntthu."

¹⁰Anaphile owaani, owiithuca awe yahonkoha tho itthu ile. ¹¹Yesu ahaahimerya: "Ntthu nohala wamwalaana amwaarawe ni waathela akina, neetta oluva ni nthiyana ule, ¹²ni nthiyana ammwalaanaka mannawe ni otheliya ni nkina, neetta oluva."

Yesu nawareeriha amirawo

¹³Yahomwihera asinamwane wiira aakwanye, nanso owiithuca yahakuphula ale yawihile asana. ¹⁴Yesu, oonaka itthu ile ahonyonyiya ni aheerela: "Mwalevele, amirwo akiweele, ni nhomole, nlattu omwene wa Nluku ori wa waya. ¹⁵Khweeli kinawuhimeryani: Ntthu hinhala waakhela omwene wa Nluku toko mmirawo, khanhala okela wonwo." ¹⁶Vahoolo ahaakusa vayawani pwathatelaka matata ni ahaareeriha.

Othaciri wovoopiha

¹⁷Wakhumawe wiira eette nkwhaha awe, ahomwatamerya

ntthu atthimakacula, ni akhoromelaka ahonkoha: "Mwalimu ooreera, kipankekeni wiira kiphwanye okumi wohimala?"¹⁸

¹⁸Yesu ahonhimerya: "Nnokihanelani ooreera? Khaawo ooreera hikhanle Nluku paahi. ¹⁹Onacuwela malamulo: Ohiive, oheette oluva, ohiinye, ohoote, ohithepye, walemelihe athumwana ni anumwana." ²⁰Ahomwaakhula:

"Mwalimu, cothene nnya kihosunka ikhumelo mmirawo."

²¹Yesu ammwehecesaka, ahomphenta, ni ahomwaakhula: "Inawuhaleela itthu imoca paahi; Orwe, watumihe citthu cothene cirinaa, wavahe nsurukhu atthu othwenya, ni ommokhalana nhakhu wirimu; owe ni okithare." ²²Nanso, weewilyawe moolumo ale, ahothulana ni ahothama ni icuku, nlattu arina mihakhu cinci.

²³Awehaka nceresere, Yesu aheerela owiitthuca awe: "Orikarika venci, atthu oothaciri okela wumweneni wa Nluku." ²⁴Owiitthuca wahooma owanoni, wowiiwa moolumo ala. Nanso Yesu ahopwahera: "Asanaaka, cirikarikilyaya okela wumweneni wa Nluku, ale ankhuluvela mihakhu."

²⁵Khavarikile ovira nkamira mwiithe wo sinkano, uhohiyana ukela nthaciri wumweneni wa Nluku. ²⁶Ale yahotikhina wootepea nanlelo ni yanawiirelana ayayoru,: "Vano, tupani nohala woopwa!" ²⁷Awehaka, Yesu ahaakhula: "Na atthu khinooryanya, nanso ni Nluku citthu cothene cinawooryanya." ²⁸Peturu ahopacera onhimerya: "Hi nihohiya cothene nihottharani." ²⁹Yesu ahaakhula: "Khweeli

kinawuhimeryani wiira khaawo ntthu nohala ohiya inupa awe, asunnawe, asirokorawe, athumwane ni anumwane, asana atthuna imatta awe nlattu wo Miyano, ni nlattu wo Nhupi Wooreera, ³⁰hinaakhela mpaka imaara emiya, nanano okati ula orihula, inupa, asunnawe, asirokorawe, anumwane, asana ni imatta, wamoca ni womolanihaciya, ni vahoolo okumi woohimala." ³¹Enci oopacera ankokhala owiheerya, ni owiheerya ankokhala oopacera."

Yesu nahimya imaara yoneeraru coohuva ni okhwa wawe

³²Owiitthuca yanaweedta ni iphiro, awelaka oYerusalemu, ni Yesu anaweedta uholo waya. Yanatkhina ni yanantthara ni woova. Ahaakusa tho owiitthuca khumi na eeli, ahopacera wahimerya itthu yahala omwiraneela,³³eeraka, "Mwiwiwe, ninawela oYerusalemu, ni Mwanawe Pinattamu nahala orwehiya mmatatani moolupale a mayasataka ni mayowantikha, na ale anahala ommaanelia omwiiva ni onrweha wasenci.³⁴Anahala ontarawa, onsuwela wiitho, omwapsyulaca ni omwiiva, nanso nihuku noneeraru nahala wunwelela."

Olepela wa asana a Sepetteu.

³⁵Yakopu ni Yohani, asana a Sepetteu, yahomwatamerya ni yahomwiirela: "Mwalimu, nimphavela, onipankele yothene inhalehu wulepela?"³⁶Yesu ahaakoha: "Nnophavela kupankeleni isiyani?"³⁷Yahomwaakhula: "Wumweneni waa, nunkome, mmoca mono nlopwana, ni nkina mono nthiyana."³⁸Yesu ahaakhula: "Khannocuwela itthu inlepelelenu. Nnawoorya owurya ikoopu inhalaka owurya, ni waakhela opatisu onhalaka waakhela?"³⁹Yahomwaakhula: "Aye, ninawoorya." Yesu ahaahimerya: "Nnowowurya ikoopu inhalaka owurya, ni nnowopatisiya ni opatiso onhalaka opatiseriya,⁴⁰nanso, wunkoma mono nlopwana atthuna nthiyana kahi thi Mi kinvaha, anovahiyia ale asunkeriyie."⁴¹Akina khumi, yiawakaru itthu ile, yahonyonyiya ni Yakopu ni Yohani.⁴²Yesu aheehana ni aheerela: "Nhocuwela cimpankaya alamuli onlaponi wiira acuwanehe iyulupale aya mmalokoni ni mahumu aya.⁴³Nanso ni nyuva khunhala okhala commo. Ntthu nophavela okhala muulupale mwa nyu eepanke nrumeysi,⁴⁴ni nophavela okhala opacera mwa nyu eepanke ipottha ya atthu othene,⁴⁵nlattu Mwanawe Pinattamu khaawile

ovareliya nteko, nanso ovara nteko ni ovaha okumi awe wiira oopole atthu enci."

Oohoona o Yeriko

⁴⁶Yahophiya o Yeriko. Wakhumaya o Yeriko ni owiitthuca awe, ni mphwinko muulupale, Partimeu, mayolepela ohoona, mwanawе Timeu, ahonkoma nceresere iparapara aphavelaka olola. ⁴⁷Weewilyawe wiira Yesu o Nasaree anavira, ahokhuwa: "Yesu, Mwanawе Taviti, okoonele ikiriri." ⁴⁸Atthu enci yanankuphula wiira ammaalihe, nanso anapwaha okhuwa khula imaara wootepe eeraka "Mwana a Taviti, okoonele ikiriri." ⁴⁹Yesu aheemela ni aheera: "Mmwiihane" Yahomwiihana ntthu ohoona yiiraka: "Olipe nrima, wunwe, nawiihana." ⁵⁰Ni ule, arulaka ikacako awe, ahotupha ni ahorwa wa Yesu. ⁵¹Yesu ahonkoha: "Ontthuna kupankele isiyani?" Oohoona ahaakhula: "Mwalimu, koone." ⁵²Yesu ahonhimerya: "Orwe, ikupalelo aa ihowoopola." Ni nananoru ahoona ni ahontthara Yesu mphironi.

11

Yesu nakela atthapeliyaka o Yerusalemu.

¹Naattamenrye o Yerusalemu, vakhiviru ni Petifaki ni Petaniya, cooco ni mwako Olivera, Yesu ahaaruma owithuca awe eeli, ²ni ahaahimerya: "Nrwe iwaani yowaattamana, mwakelaka nnamphwanya mwaapuru oothukiya, hinaya oweliya ni ntthu. Mwantthukule ni nkiwihere. ³Akhalaka ntthu nookohani: Nlattuni mpankaka cicammo. Mwaakhule Apwiya anamphavela, ni ankowuturuselani wowakuvyaca." ⁴Yahorwa phumphwanyaka mwaapuru natthukeleliye wankhorani, mphante wovate woluwani, ni yahontthukula. ⁵Ni atthu yaari wonwo yahokoha: Nnopankani munthukulaka

mwaapuru? ⁶Yahaakhula toko Yesu cahimenrawe, ni yahaahiya orwaca. ⁷Yahonrwehela Yesu mwaapuru uyo, yahonkhunela cowara caya, ni Yesu ahomwela. ⁸Atthu enci yanawatala cowara caya mphironi, akina yamwarusela mirittha cikithi caathikinlyaya mmattani. ⁹Atthu yahoonle na ale yantthara yanakhuwa: Osaana, noreeriya nowa mwancina na Apwiya. ¹⁰Ohoreeriya omwene omwa wa athumwanihu Taviti. Osaana wonculu. ¹¹Yahophiya o Yerusalem, Yesu ahokela Inupa ya Nluku, ni namanle oweha citthu cothene canrukurenrye, wahokhala yocoocilo, ahokhuma, phurwaka o Petaniya ni owiitthuca awe khumi na eeli.

Mwiri wonhokorokho onalaphiya

¹²Wasilyaya wicusu wakhumaya oPetaniya, Yesu yahommola itala. ¹³Oonaka ottayi mwiri wonhokorokho waari ni matakuru aya makithi, ahorwa oweha wakhala wiira aphwanya mwamwetthu owiima, nanso attameryaka, khaphwanyile, aphwanyile matakuru paahi, kontha khawari okati wo wiima mihokorokho. ¹⁴Aheerela vano, "Hikhale tho nohala olya cowiima caa. Ni owiitthuca awe yaheewa itthu ila.

Mayothumiha anawomoliya.

¹⁵Yahophiya o Yerusalem, ni akelaka Inupa ya Nluku ahopacera woomola mayothumiha, na ale yathuma wonwo, ahokaakhela vathi meeca a atthu yaakkhanhiha, ni ihice ca atthu yathuma ikhuntta. ¹⁶Ni khaalevela wiira ikusiyi itthu yakhuma Inupa ya Nluku. ¹⁷Ni anaweethuciha eeraka: Ehantikhiya: Inupa aka inowowihaniya inupa yooswali oneethi wothene. Nanso nyu nhotatusa nikhuku na namwiinya. ¹⁸Oolupale a mayasataka ni mayowantikha yaheewa itthu ile, ni yaanaphavela mananna omwiiva, nanso yaanamoova, nlattu mphwinko woothene

wanawumiya mwaano ni meetthuciho cawe.¹⁹ Wiila waya, yahorwaa otaa waya iparasa.

Mwiri wonhokorokho wowuma.

²⁰Ovira waya, wicusu, yahoona mwiri wonhokorokho onoomile, ni mitithari caya coothene. ²¹Ni Peturu opuwelaka, ahomwiirela Yesu: Wooneke mwalimu, mwiri wonhokorokho olaphilyaa, ohooma. ²²Yesu aheerela: Munkupali Nluku. ²³Khweeli kinawuhimeryani: Ntthu eerelaka mwako ula: Wiiphele nipuro niryaa vivonyere opahari, ni ahaanyihereke munrimani mwawe nanso akupaliki wiira itthu ihmilyawe inahala wiiranya; khweeli, inawiiranya. ²⁴Phimaana, kinawuhimeryani wiira citthu cothene cinhalenyu olepela nswaliki, nkupaliki wiira nnawaakhela, ni nnowopattha. ²⁵Mwemelaka vale wiira nswali, mwakhalanaka mwamweetthu ni nkhwiinyu, munleveleke wiira Athumwaninyu, ari wirimu, yuleveleleni cookosa cinyu. ²⁶Nlattu, mwahaleveleke akhwinyu, Athumwaninyu ari wirimu khanhalaolevelela cookosa cinyu.

Ikuru awe Yesu yoolamula

²⁷Yahoturuwela o Yerusalem, ni Yesu eettaka Mpani mwa Nluku, oolupale a mayasataka, mayowantikha ni mahumu, yahomwaattamerya ²⁸ni yahoonkoha: Ompanka citthu nnya ni nlamulo nawani? Olamulenle tipani opanka citthu nnya. ²⁹Yesu ahaakhula: Hata ni mi, kinawukohani itthu. Nkaakhule, ni vano kinahala wuuhimeryani wiira kinapanka citthu nnya ni nlamulo nawani. ³⁰Opatiso wa Yohani waari wo wirimu, atthuna wa atthu? Nkaakhule. ³¹Yahopacera okohana ayayoru, yiiraka: Neeraka, wo wirimu, nahala wiira: Nhikupaliki mweeco? ³²Neeraka, wa atthu, ninawooova mphwinko. Nlattu othene yanamoona Yohani toko namilohi. ³³O mwiisoni yahomwaakhula:

Khanincuwela. Ni Yesu aheerela: Hata ni Mi akinohimeryani ni nlamulo nawani kinapanka citthu nnya.

12

Nlikanihero na mayolima imatta yo vinyu.

¹Yesu ahopacera woolumacera ni malikanihero:Ahaawo ntthu aanle imatta yo vinyu, ahopophela nkuco, ahothipa nlitti no waamiha ivinyu ni ahoteka ipwaro. Vahoolo ahaahiyera ananteko akhoolaka ikwaha awe yoottayi. ²Okati woohephiya, ahonruma nrumeiyi awe wiira aakhele nuusu no cowiima co mmattani. ³Ale nanso, yahommara, yahomwaatta ni onturusela uttuli wohiithtu. ⁴Ni aharumihela nrumeiyi nkina. Ni uyo tho yahompwesa muru ni yahontarawa venci. ⁵Ahonruma nkina, ni ule yahomwiiva. Ahaarumihela akina enci, na ale yahaatta ni akina weeva. ⁶Nahalenle nlelo mwanawe oophentiya, omwisoni ahonruma ule, eeraka: "Anahala onlemeliha mwanaka." ⁷Nanso, ananteko yaherelana ayayoru: "Ule phinkokhalana imatta ila! Nrwe, nimwiive, ni imatta inakhala yawihu."

⁸Yahommara ni yahomwiiva, ni onrihela nceresere imatta. ⁹Mwanene imatta ile nohala opankani? Nahala oturuwa ni weeva ananteko ayo, ni vahoolo, nahala waavaha imatta ananteko akina. ¹⁰Khansomile cowantikhiya cittakattifu?

Nluku nikhattiye ni mayoteka, nihothatuwa nluku no vanlothoni nowokolela inupa.

¹¹Itthu ila iri nteko wa Apwiya, ni ori woothamaliya wamiithoni wihi.

¹²Yaanawavya ommara, nanso yanawooova mphwinko, nlattu yaheeweha ratta, wiira nlikanihero nne naaca yayo. Yahanhiya ni yahorwaca.

Nsoko wa Sesari.

¹³Vahoolo yahonrumihela mafarisi ni aHerotiyano akina wiira ammare mmoolumoni. ¹⁴Amwaattameryaka yahomwiirela, "Mwalimu, nihocuwela wiira ori nlopwana eekhweeli, khaawo nonramelaa, nlattu khumweha makhalelo a ntthu, nanso onawiitthuciha iphiro ya Nluku, toko cinkhalaaya yeekhweeli. Onihimerye, iri itthu yooloka atthuna yoohiloka onvaha nsoko Sesari? Ninvahe atthuna nihinvahe? ¹⁵Yesu acuwelaka wototha waya, ahaakhula, "Nnokittehacerani? Nkiwihere nikopiri, koone."

¹⁶Yahomwihera ni ahaakoha: "Yawani ila yocaphariya, ni yowantikhiya?" Yahaakhula: "Ya Sesari." ¹⁷Yesu aheerela: "Mumvahe, mweeco, Sesari itthu ya Sesari, ni Nluku itthu ya Nluku." Ni yahotikhinaca venci.

Nlahanya wo wunwelela

¹⁸Vahoolo yahowa masatuseu, ale aneera khuwo wunwelela wa atthu ookhwa, yahomwaattamerya, ni yahonkoha Yesu: ¹⁹"Mwalimu, Musa honantikhela wiira ntthu ankhwelaka munnawe, pwahiyaka amwaarawe woohikhalana asana, nhimaawe nolamuliya onthela nthiyana oohinya wiira ahiye ipyo ya munnawe. ²⁰Vano ahaawo nlopwana na asihimawe siita, ni oopacera uyo ahonthela ni ahokhwa woohahiya asana. ²¹Onayeeli ahonthela nthiyana ahinye, ni uyo ahokhwa woohahiya asana, ni oneeraru uyo waheeranya cicammo, ²²ni othene saapa yahokhwa woohahiya asana. Wimaleloni waya nthiyana uyo ahokhwa. ²³Vanhala wunweleliya , nthiyana nohala okhala amwaara awani, nlattu asilopwana saapa ale yahonthela nthiyana ule? ²⁴Yesu ahaakhula: Nyu nnawithepyaca nlattu woohicuwela cowantikhiya cittakattifu hata ikuru ca Nluku. ²⁵Phimaana wanhalaya wunwelela mwaatthu ookhwa, khuwo otheliya, mena khuwo othelana, nanso ammokhala toko ancelo o wirimu. ²⁶Nanso itthu inaaciya mowunwelelani mwaatthu ookhwa, khansomile ikitapu ya Musa, itthu yeranele ni

nikukhu naapharela woohivya, toko Nluku caamulumacenryawe eeraka: "Mi kiri Nluku a Aprahamu, Nluku a Isaaki, ni Nluku a Yakopu?"²⁷ Khankhala Nluku a atthu ookhwa, nanso Nluku a atthu akumi. Nyu khanreere weetta ni ututhi.

Nlamulo nootepa wunuwa.

²⁸Ahomwaattamerya mayowantikha eewile avanyihanaka, ni oonaka wiira Yesu aakhunle ratta, ahonkoha: "Phinni nlamulo noopacera o malamuloni othene?"²⁹ Yesu ahaakhula: Noopacera phi nna: Wiiwe Israel, Apwiya Nluku iku pha Apwiya vekhaaya.³⁰ Waaphente Apwiya Nluku aa, ni nrima aa wothene, ni nnepa aa wothene, na ankhili aa othene, ni ikuru caa cothene.³¹ Nonayeli phi nna: Onphente nkhwaa toko we omwanene. Khaniwo nlamulo noopwaha ala.³² Mayowantikha yahomwiirela: "Oreera cinene, Mwalimu, khaawoothile veenryaa wiira Ule ri vekhawe ni khaawo tho nkina noompwaha Ule;³³ ni omphenta ni nrima wothene, ni ankhili othene, ni nnepa wothene ni ikuru cothene, ni omphenta nkhwawe toko omwanene, iri itthu yootepa woovikana isataka coopahiya ni coovelelihiya cothene.³⁴ Yesu, oonaka wiira ntthu ule ahaakhula ni nrku, ahomwiirela: Khuri uttayi ni omwene wa Nluku. Ni khariwo tho onkoha itthu.

Mesiya, Mwana ni Apwiya a Taviti.

³⁵Eetthucihaka Mpani mwa Nluku, Yesu ahokoha: "Mayowantikha ahimyaka cani wiira Mesiya phiri mwanawе Taviti?³⁶ Taviti mwanene, athoonyeriyaka ni Nnepa Nttakattifu, heera:

'Apwiya yahomwiirela Apwiya aka:
Wonkome moono aka nlopwana, mpaka
Mi keese eenani aa vathivaya manyaa aa.'

³⁷Taviti mwanene namwiihana, Apwiya. Nokhalaka cani

mwanawe?" Ni mphwinko muulupale wanamwiiwa ni otteeliya nrima.

Yesu nawaattikttha aalimu o malamulo

³⁸Wowiitthuciha, Yesu anawiira: "Nkhale miitho, mwisunke ni mayowantikha onacivela othoonyera coowara coorekama ni okohiya isalamu mmapuwani; ³⁹wonkomu mapuro ohoole nnsinakokani ni mapuro anliya isukuhuulu, ⁴⁰Anawalyacera anankwele yoothereryaka ni iswali coottaliva. Ala anowowaakhela ihukhumu yootepa."

Yoovaha ya nankhwele oohuva.

⁴¹Nonkomile nipuro naheliya coovelela yawahaka atthu yahela nsurukhu nkasanu mwe. Mathaciri mencu yanahela nsurukhu mwinci. ⁴²Ahowa nthiyana nankwele oothwenya, ahelaka makopiri meli oyevaca, manaaaya nikupatta nonecese. ⁴³Eehanaka owiitthuca awe, Yesu ahahimerya: "Khweeli kinawuhimeryani wiira nthiyana ula nankhwele oothwenya hohela woopwaha atthu outhene ahenle nkasanu yo nhakhu. ⁴⁴Nlattu, outhene yahenle yohalahala muthacirini mwaya, nanso nthiyana oothwenya ahenle yothene yarinawe, ni khahalanne itthu hata yankani."

13

Yesu nahimya otankuliya yo Inupa ya Nluku.

¹Wakhumaawe Mpani mwa Nluku owiitthuca mmoca ahonhimerya: "Mwalimu, moone, maluku mencu ale ni cootekiya nnya!" ²Yesu ahaakhula: "Onawoona cootekiya nnye cuulupale? Khaninkela nahalaka nluku nimoca waculu nluku nikhwaya, cothene cimmotankuliya."

Ohuva ni ottharaththariya

³Ni nonkomile mmwako wo Oliveyra ohoole aya Inupa ya

Nluku, Peturu, Yakopu, Yohani ni Anttree, yahonkoha watthikini: ⁴"Onihimerye wiira citthu nnye cinhala wiranyaa yaakhani, ni ikanyero inhala othonyera wiira citthu nnye ciri vakhiviru." ⁵Yesu ahopacera wahimerya: "Mwisunke wiira hikhale ntthu noothepyani. ⁶Kontha, anahala uwa atthu enci mwancina naka, yiiraka: 'Phi mi!' mpaka wathepya atthu enci. ⁷Mwiiwaka columacyaka cokhotto, ni myaha cokhotto, nhituthuwe. Citthu nnye cinalamuliya wiiranyaa nanso khunakhalaka mwiso. ⁸Nloko nimoca ninhala ovaraana ni nloko nikhwaya, omwene mmoca ni omwene nikhwaya. Ilapo inahala othukumela mapuro makina, ni immovola itala. Citthu nnye ciri mapacerero wooma coowerya.

Okati woooopiha

⁹"Nkhale miitho! Anahala wurwehani opwaroni, nnahala wapsyuliya nnsinakokani. Nnahala weemesiya wa miithoni wa mayansatoro ni mamwene nlattu wo Miyano, wiira mmahe osaahiti wamiithoni waya. ¹⁰Nanso woopacera Nhupi Wooreera onahala ohimeriya maloko othene. ¹¹Vano mwakusiyaka wiira moolumaciye makhuce, nhoove ithu inhalenu ohimya. Nanso nhimye ithu inhalenu ovahiya okati yooyo, kahi mweeco nyuva nnohala wulumaca, nanso Nnepa Nttakattifu. ¹²Munna nahala onrweha o nokhwani munawane, ni athumwane mwanawee; ni asana ammowulumacera makhuce athumwanaya, mpaka weeva. ¹³Ni nnahala wiinananiya nlattu wo ncina naka, nanso ntthu nohala okhalana nthiti mpaka omwisoni, nowowoopwa.

Icuku yuulupale o Yutteya.

¹⁴"Moonaka citthu co miikho cikhumelelaka toko itankuleliyo wahimphwanelaya okhala, (nosoma oyo eeweehe) vano ale ari o Yutteya atthawele mmwakoni. ¹⁵Ari wancarani ahikhuruwe hata ahikele mpani wiira akuse citthu

caya.¹⁶ Ari mmattani ahituruwele owaani wiira yakuse coowara caya.¹⁷ Atakhaliye phaale ari ni irukulu, na ale anaamwiha asana mahuku ale!¹⁸ Nswali wiira itthu ile ihiranye okati weyiita.¹⁹ Nlattu mahuku ale coohosiya cinkokhala toko caharyaya okhalakaru, ikhumelo wapatusilyawe Nluku ittuniya, mpaka nnava, hata khacinkela cakhalaka tho.²⁰ Ni yahari Apwiya akhuvehaka mahuku ale, hata ntthu khoopwa, nanso nlattu wa atthu oothanliya nahala okhuveha.²¹ Akhalaka ntthu nohimeryani: 'Mesiya ri vava!' atthuna: 'Omoone wonwo!' Nhikupali,²² kontha anahala wunwa amesiya owoootha ni anamilohi owoootha ni ankopanka ikhanyero ni cootikhineeha wiira yaathepye, wanooranyaya, hata oothanliya.²³ Nanso nyu, mwisunke; kihohimeryani cothene marapuroru.

Owa wawe Mwanawe Pinattamu.

²⁴"Nanso mahuku ale, anamanle mahuviho ale, ncuwa ninahala oripela, ni mweeri khunhala waarya,²⁵ itthoottwa cinahala omora wirimu, ni ikuru conculu cinahala opukunyiya.²⁶ Vano nahala wooniya, awaka mmahutteni Mwanawe Pinattamu ni ikuru cuulupale ni waarya.²⁷ Nahala waruma ancelo awe ni wathukumaniba atthu yathanlilyawe mittetthe comicese co'phyoo, nceresere aya ilapo ni nceresere aya irimu.

Nlikanihero no mwiri wonhokorokho.

²⁸"Mwiithuce, mweeco, nlikanihero no mwiri wonhokorokho. Miritta caya cakhalaka miheenya, ni capaceraka ophuwa, nhocuwela wiira iyiita iri vakhiviru.²⁹ Cicammo nyu, moonaka okumelela citthu nnya, ncuwele wiira Mwanawe Pinattamu ri vakhiviru wankhora.³⁰ Khweeli kinawuhimeryani: Khanimmira nloko nna cihiraneele citthu cothene nnya.³¹ Irimu ni ilapo cinahala ovira, nanso moolumo aka khanhala ovira.

Khaawo ancuwela nihuku hata okati.

³²"Nanso khaawo nocuwela nihuku nne, hata okati ule, mena ancelo o wirimu, mena Mwana, nanso Athumwane paahi phincuwela. ³³Nkhale miitho, mwiliphile! Nlattu khannocuwela nihuku ninhalaya ophiya okati ule. ³⁴Ori toko ntthu alakenle ikhwaha awe, ahiyaka inupa awe, ahahiyera iyulupale arumeyi awe, khula ntthu ahovahiya nteko woovara, ni ahonlamulela mayokhaliha wiira owliphile. ³⁵Vano mwiliphile, nlattu khannocuwela okati onhalaawe owa mwanene iththoko; toko yocoocilo, atthuna ohiju iriyari, atthuna oneepile nthupi, atthuna wicisu, ³⁶wahikhumelele wiira, nawile ni wututuserani, huphwanyeni nrupaka. ³⁷Itthu inohimeryakani nyu, kinahimerya atthu othene: Mwiliphile!"

14

Ayutteu anawulumaca makhuce.

¹Yahanle mahuku meeli ophiya isukuhuulu yo Pasikuwa ni nihuku ninliyaya mikatthe coohimiropo, oolupale a mayasataka ni mayowantikha yanaavya mananna onththuka wo makhuce ni onrweha onookhwani. ²Yanawiira: "Itthu ile ihiriye mahuku o sukuhuulu wiira atthu ayo ahipanke ipokoho."

Yesu nattikittheliya ni makhura onukhela oPetaniya.

³Yesu nari oPetaniya, nonkomile wameeca mpani mwawe Simoni omakunttula, ahowa nthiyana, acisile iphotiri yo nluku ya alapasturo inheliya makhura onukhela yeehaniya narttu, anthumihiya ncurukhu mwinci, napwesile iphotiri, ahomwitthela makhura mmuruni wa Yesu. ⁴Nanso akina yahonyonyiya, yiirelanaka ayayooru: "Ariheliyeniciammo makhura ala?" ⁵Yanawoorya othumihiya ni ncurukhu emiya tharu, mpaka wakawela atthu oothwenya." Ni yahonkuphula

athiyana ale. ⁶Yesu nanso aheera: "Onhiyeke. Munkuphulelaka isiyani? Hokipankela itthu yooreera; ⁷Kontha, atthu oothwenya phinakhalaneenyu, ni mwatthunaka nnawoorya waapankela cooreera, nanso miyano akinkhala ni nyu mahuku othene. ⁸Ale ahopanka itthu yoonryaya. Ahoottiha ni makhura irutthu aka ahoolelihaka ovithiya waka kihinaaya okhwa. ⁹Khweeli kinawuhimeryani, wiira mwiiilaponi mothene onhalaya olalyaa Nhupi Wooreera, inahala tho ohimiya itthu yapankilyawe wiira opuweleliye."

Yutta nawuluma makhuce

¹⁰Vano, Yutta Iskarioti, mmoca mwaale khumi na eeli, akenle woolupale a mayasataka wiira amulume makhuce Yesu. ¹¹Weewilyaya moolumo ale, cahaatteela mirima ni yahovanelia ommaha nsurukhu. Yutta anawavya okati wontumiha Yesu.

Yesu nalyana Owiitthuca awe ikwaha yoomaliha

¹²Nihuku noopacera no mikatthe coohimiropo, okati waveleelihiya mwakhontwa o Pasikuwa, owiitthuca yahonkoha Yesu: "Nnotthuna olokiheriya vayi nipuro noonlya Pasikuwa?" ¹³Ahaaruma owiitthuca eeli ni aheerela: "Murwee oparasa nnahala omphwanya ntthu oocisa mwaapu o maasi. Munthare, ¹⁴ni onkelaawe, munhimerye mwanene inupa: 'Mwalimu naakoha: Inupa inhalaka omaka iri vayi, kinlyaka Pasikuwa ni owiitthuca aka?' ¹⁵Ni nahala wuthonyerani nsana nuulupale oculu nooreerihya ni nowaaya; mwanilokihere nenno." ¹⁶Akhumaka owiitthuca awe, yahorwaa oparasa, ni yahophwanya toko cahimeriyaya; ni yahontthonkomaniha Pasikuwa.

¹⁷Wiila waya, Yesu ahophiya ni owiitthuca awe khumi na eeli. ¹⁸Anonkomacile alyaka, Yesu aheera: "Khweeli kinawuhimeryani, mmoca mwa nyu, nolya ni mi, nahala

okuuluma makhuce." ¹⁹Yahanca ocukulaca, yiirelanaka ayayoru: "Kahi thi mi?" ²⁰Yesu ahaakhula: "Phi mmoca mwa nyu khumi na eeli, nokilyana ntiisini nimoca." ²¹Nlattu, Mwanawe Pinattamu narwa, toko cantikhelyawe, nanso natakhaliya ntthu nohala omuluma makhuce! Fatari ahiyariye."

²²Walyaya, Yesu ahokusa nkatthe ni nareerihile, ahomyaniha ni ahavaha owiithuca awe, eeraka: "Nkuseke, nlyeke, ila phi irutthu aka." ²³Vahoolo ahokusa ikikhompe, ahosukuru ni ahaavaha ni othene yahowurya yariweyo. ²⁴Ni ahaahimerya: "Ila phi iphome aka, iphome yo waatana wonaanano, invuviheriya atthu enci." ²⁵Khweeli kinawuhimeryani wiira akinhala tho owurya yowiima ila yo viteera mpaka nihuku ninhalaka owurya tho wumweneni wa Nluku." ²⁶Aneepile ncipo, yahokhumaca arwaka omwako wo Oliveyra.

Yesu nahimya wiira Peturu nahala onkhotta.

²⁷Yesu ahaahimerya: "Nyu othene, ohiyu ula, nnahala ohiya ikupalelo nlattu wo Miyano, kontha ihantikhiya: 'Kinankaliha nhakheli ni ikhontwa cinkomwaryaca.'

²⁸Nanso kinonwelenle, kimmowuhoolelani wokela oKalileya." ²⁹Peturu aheera: "Hata othene ahiye ikupalelo aya, nanso mi, mena." ³⁰Yesu ahomwaakhula: "Khweeli kinawuhimeryani: Ilelo ohiyu ula, nthupi ohinaya wiipa imara piili, onakikhotta imara tharu." ³¹Nanso Peturu ahopwahera wakhula ni ikuru eeraka: "Hata kilamuliye okhwa ni Nyu, akinookhottani." Ni othene yaholumaca cicale.

Yesu o Yetsemani

³²Yahorwaa nipuro neehaninya Yetsemani, ni Yesu ahaahimerya owiithuca awe: "Munkome vava mi kiswaliki."

³³Ahonkusa Peturu, Yakopu, ni Yohani, ni ahanca woova ni ucukula. ³⁴Ahaahimerya: "Nnepa aka onacukula, icuku yo

nokhwa. Nkhale vava ni mwiliphile."³⁵ Apwahaka vakani, ahowuluwela vathi ni ahoswali wiira, wooryanyaa, okati ula okipwahe.³⁶ Ni ahohimya: "Aappa, Tiithi; Nyu nnawoorya cothene. Nkitamihe mmahuvihoni! Nanso, cihipankiye cintthunaaka, nanso cintthuneenyu."³⁷ Oturuwa wawe, aphwanyile arupaka, ni ahomwiirela Peturu: "Simoni onarupa? Khawoonrye wiliphila iwora imoca?"³⁸ Mwiliphile ni nswaliki wiira nhithokociye. Nrima onatthuna ratta, nanso irutthu khinlipa."³⁹ Ahorwaa tho oswalini, aakulelaka moolomo yayo.⁴⁰ Ahoturuwa, ni ahaaphwanya arupaka kontha miitho aya yahocara ikhove. Ni khayoonaa yomwakhula.⁴¹ Ahowa imaara yoneeraru mpaka waahimerya: "Nnarupa ni nnamumula tho? Wahotosa! Okati ohophiya. Mwanawee Pinattamu nahala orwehiya mmatatani mwaatthu ookosakosa."⁴² Muunwe, Nrwe! Namakhuce aka hophiya."

Yesu natthukiya.

⁴³ Yesu oolumacaka nanlelo phaphilyawe Yutta, ari mmoca mwaale khumi na eeli, ni mphwinko muulupale waakhumile woolupale a mayasataka, mayowantikha ni mahumu ni waarina ikatana ni ikopo.⁴⁴ Namakhuce ahaaleha ikanyero eeraka: "Nohalaaka onkoha isalaama, phi yoyo, mummare ni munkuse natthukiye ratta."⁴⁵ Ophiya wawe, ahomwaattamerya ni ahomwiirela: "Mwalimu!" ni ahonkoha isalaama.⁴⁶ Yahommara Yesu, ni yahontthuka.⁴⁷ Vano, mmoca mwaale eemenle wonwo, ahokumiha ikatana ahorakaliha ipottha ya nkhulupale a mayasataka, ahonthikila nnyaru.⁴⁸ Yesu ahaahimerya: "Nkhumile ni ikatana ni ikopo uwa okitthuka, toko mayohukha."⁴⁹ Kaari ni nyu mahuku othene mpani mwa Nluku, kiithucihaka ni khamwakithukile. Nanso wiira citthariheleliye toko caantikhiyaya."⁵⁰ Vano, anhiyaka, othene yahotthawa.

⁵¹ Ni ahontthara mmirawo mmoca eekhunenle ikuwo.

Yahommara,⁵² nanso ahiyaka ikuwo ile, ahotthawa pwitipwiti.

Yesu opwaroni yo mayutteu

⁵³Yahonrweha Yesu wankhulupale a mayastaka wathukumannyaya othene oolupale a mayasataka, mayowantikha ni mahumu.⁵⁴Peturu ahontthara uttayittayi mpaka nhina ipuwa ya nkhulupale a mayasataka. Peturu wonkomilyawe wamoca ni ananteko ootthaka mooro.

⁵⁵Vano, oolupale a mayasataka ni mayothukumana othene yaavya osaahiti, wowiira omwiive Yesu, nanso khayaaphwanyile.⁵⁶Enci yanahimya cowootha, nanso caahimilyaaya khaweerana.⁵⁷Ahaawo yeemenle ni oromola yowootha ila yiiraka:⁵⁸"Hi nihomwiiwa ahimyaka: 'Kinhala okwanyula inupa ila, itekiye ni matata a atthu, ni mahuku mararu kinahala oteka ikina yoohitekiya ni matata a atthu.'"

⁵⁹Nanso, hata cicammo osaahiti aya khaweeranne.⁶⁰Vano, muulupale o mayasataka aheemela iriyari aya atthu yathukumanne ni yahonkoha Yesu: "Khunakhula itthu nhina osaahiti ommahaya atthu ala?"⁶¹Yesu nanso ahomaala ni khaakhunle itthu. Muulupale a mayasataka ahonkoha tho: "We ori Kristu, Mwana a Nluku Ooreerihya?"⁶²Yesu ahaakhula: "Kiri mi, ni nnahala ommoona Mwanawee Pinattamu nonkomile moono nlopwana wa Nluku okuru, ni awaka mmahutteni o wirimu."⁶³Vano, muulupale a mayasataka ahaahula coowara cawe ni aheera: "Nimphavela tho vayi osaahiti?⁶⁴Mwanamwiiwa okufuru nwo. Nneera cani?" Na atthu othene yahonhukhumu okhwa.⁶⁵Vahoolo, akina yanapacera onsuwela, yahonkhunela wiitho ni ikuwo ni omwaatta yiiraka: "Ohimye ca namilohi!" Ni mayorontta yahonkusa ni omwaattakaca.

Peturu nanruna Yesu

⁶⁶Peturu neemenle vate wapuwani, ahophiya nanteko

mwanthiyana a muulupale a mayasataka,⁶⁷ ni omoona wawe Petru ootthaka mooro, ahomwehecesa ni ahomwiirela: "We khweeli wari ni Yesu o Nasaree."⁶⁸ Ule nanso ahoruna, eeraka: "Akinoncuwela, hata akineeweha inhimyaa eyo." Vahoolo ahokhuma vate iluwani, ni nthupi waheepa.

⁶⁹Nanteko mwanthiyana, omoona wawe tho, ahahimerya atthu yaatamananyaawe: "Ula phi mmocaru."⁷⁰ Nanso ahoruna imaara yonapiili. Okati vakani tho, ale yaari mmo, yahonhimerya Petru: "Khweeli we phi mmocaru, kontha ori nkalileya."⁷¹ Nanso aholapha ni aholupela eeraka: "Akinoncuwela ntthu nnomwaacenu."⁷² Ni nenna nna nthupi waheepa imaara yonapiili. Vano, Petru ahoopuwela itthu yahimilyawe Yesu: "Nthupi ohinaya wiipa imaara piili, we onahala okiruna imaara tharu." Ni vava ahopacera wunla.

15

¹Osaakaru, yahothukumana oolupale a mayasataka wamoca ni mahumu ni mayowantikha, manaaya mayonthukumano othene; ni ontthuka waya Yesu, yahonkusa ni yahommeleela waPilatu.

²Pilatu ahonkoha: "We ori Mwene a Mayutteu?" Yesu ahomwaakhula: "We oohimya."³ Ni oolupale a mayasataka yahonriyelela citthu cinci.⁴ Pilatu ahonkoha tho eeraka: "Khunakhula itthu? Woone, citthu cinci cinriyeleyia na atthu ala."⁵ Yesu nanso khaakhunle tho itthu, ni Pilatu ahotikhina.

⁶Nihuku nosukuhuulu, Pilatu aholemalela ontthukula nantthukiya mmoca yantthunaaya atthu.⁷ Ahaawo mmoca, eehaniya Parapasi, atthukiye na anakhotto yoporonka nlattu womwiiva ntthu.⁸ Mphwinko wa atthu, wahonwa ni wahopacera olepela itthu yalemalenlyawe wapankela.⁹ Pilatu ahaakhula: "Nnotthuna wiira kutthukuleleni Mwene a Mayutteu?"¹⁰ Nlattu ahocuwela wiira oolupale a mayasataka

yamwihenre nlattu woonrama.¹¹ Nanso oolupale a mayasataka yanatheperya mphwinko wiira phatari Pilatu antthukule Parapasi.¹² Pilatu ahaakoha: "Kinhala omwiiriha isiyani ula nnomwiihanenyu Mwene a Mayutteu?"¹³ Na ale yankhuwaca tho: "Onkhomele wansalapani!"¹⁴ Vano Pilatu aheera: "Tthekileni?" Nanso ale yanakhuwaca: "Onkhomele wansalapani!"¹⁵ Pilatu, attunaka wamaaliha atthu ale, ahaataphulela Parapasi. Ni aholamula wiira Yesu apsyuliye ni akhomeliye wansalapani.

Yesu nawapsyuliya

¹⁶ Anakhotto yahonkusa opwaroni ya nsatoro, ni yaheehaniya anakhotto othene.¹⁷ Yahomwariha ihancu yookhwila, ni yahomweesa ikhilempa yo miiwa wamuruni wawe.¹⁸ Vahoolo yahopacera onkoha nretele yiiraka: "Salaama, Mwene a Mayutteu!"¹⁹ Yanamwaatta wamuru ni nthale ni yanansuwela ni ankhromelaka yananlapela.²⁰ Wamanlyaya ontarawaca yahonrula ihancu yokhwila ni omwariha tho cawawe. Vano yahonkusa wiira akhomeliye wansalapani.

Yesu nakhomeliya wansalapani

²¹ Yahommara athumwane Alisanttere ni Rufu, eehaniya Simoni o Sirene aakhuma omawaani ni ahokanyererihiya okusa nsalapa.²² Yahonrweha nipuro neehaniya Kolokootha, manaaaya: Nipuro nokohi.²³ Yahommaha ivinyu yootakanikeriya ni miira, nanso ahokhotta owurya.²⁴ Vahoolo yahonkhomela wansalapani. Ni akawelanaka cowara cawe, yahopanka mwaavi wiira yoone yahalaawe ophwanya khula ntthu.²⁵ Yaari iwora yoneeraru wakhomeliyawewe wansalapani.²⁶ Waculu wawe yahantikhiya yariyeleliyawewe: "Mwene a Mayutteu."²⁷ Yahokhomeliya wamoca ni Ule, mayohukha eeli, mmoca, moono nlopwana, nkina moono nthiyana.²⁸ Cicammo coothariheleliya

cowantikhiya cineera: Ahaalikeliya na atthu oonanara nrima.

²⁹Atthu yaavira ayo, yananruwana, apukunyaka muru, yiiraka: "We! Watankulaca Inupa ya Nluku ni oteka tho mahuku mararu. ³⁰We wicoopole o mwanene, ni okhuruwe wansalapani!" ³¹Oolupale a mayasataka ni mayowantikha yanateehana, yiiraka: "Hoopola akina ni khanoorya wicoopola mwanene. ³²Akhuruwe naanano wansalapani uyo Kristu, Mwene o Israel, wiira nimoone ni ninkupali." Ni atthu ale yakhomeliye ni Ule, yananruwana.

Yesu nakhwa

³³Waphilyaya okati woothana ipiphi yahokhunela ilapo yothene mpaka yoococilo. ³⁴Ophiya waya yoococilo Yesu ahokhuwa ni ncu noorunya: "Eloi, Eloi, lama sapaktani!" Manaaya: "Nluku aka! Nluku aka! Okhihiyenreni vekhaaka?" ³⁵Omwiwa waya, akina yaari wonwo, yaheera: "Moone, nomwiihana Eliya!" ³⁶Mmoca mwaale ahothimakaca owiha ntthoce nooheliya makari ahotthukelela muntathini ni ahommaha wiira awurye, ni ahohimya: "Noone wiira Eliya nawa onkurusela vathi." ³⁷Akhuwaka ni ncu noorunya, Yesu ahokhwa. ³⁸Vano ikuwo yo Mpani mwa Nluku yahaahuwa iriyariru okhuma oculu mpaka vathi. ³⁹Muulupale a anakhotto eemenle cooco wariyawé Yesu, omoona wawe akhwaka cicale, aheera: "Khweeli ula ari Mwana a Nluku!"

⁴⁰Yahaawo tho athiyana yemenle uttai amwehaka; mwaale ahaawo Mariya Mantalena, Mariya anumwane Yakopu mwankani ni Yosefi, ni Saloome. ⁴¹Wariyawé Yesu oKaliyeya yayo yanththanre ni onvarela ntekó, ni athiyana akina enci yanvelenle wakenlyawé oYerusalem.

Yesu navithiya mmahiyeni

⁴²Wiila waya, hapo wari okati wowiitthenkaciya nihuku nontivela, ⁴³ahowa Yosefi o Arimateya, humu oocuwanyaa ni

oottithima, akhuluvenle owa waya omwene wa Nluku, alipile erima wokela waPilatu ni aholepela nrutthu wa Yesu.

⁴⁴Ni Pilatu ahotikhina mari nakhwile, ni amwiihanaka muulupale anakhotto ni ahonkoha akhala wiira khwile mwakhalayi. ⁴⁵Ni nahimeriye ni muulupale uyo, nrutthu ahovahiya Yosef. ⁴⁶Yosefi nathumile ikuwo, ahokurusa nrutthu wansalapani, ni ahokhuneela ni ikuwo eyo. Vahoolo ahommitha mmahiye yathihiye wamwalani ni ahopirikisela nluku nuulupale wankhora wo mahiye. ⁴⁷Mariya Mantalena, ni Mariya anumwane Yoseti yanaweha nipuro navithiyawe.

16

Yesu ahonwelela

¹Ovira waya nihuku no ntivela, Mariya Mantalena, Mariya anumwane Yakopu ni Saloome yahothuma makhura oonukhela ni yahorwaa ottikitthela nrutthu wa Yesu. ²Wicisu ncuwa nikhumaka nihuku noopacera no'sumana, yahorwaca omahiye. ³Yanawaakaaka yiiraka: "Tipani nokela onipirikisela nluku no wankhora wo mahiye?" ⁴Nanso, awehaka, yahoona wiira nluku nopirikiseliya nceresere ni nari nluku nuulupale cinenne. ⁵Okela waya mmahiye yahomoona mmirawo nonkomile moono nlopwana, awanre ihancu yootela, ni yahotuthuwa. ⁶Uyo nanso, ahaahimerya: "Nhituthuwe. Nnomwavya Yesu o Nasaree akhomeliye wansalapani. Honwelela, khaawo va. Moone nipuro namweesilyaya. ⁷Vano, murwee, mwahimerye owiitthuca awe ni Peturu wiira Yesu nahala wuhoolelani oKalileya. Wonwo nnahala omoona toko coohimenryaweni."

⁸Akhumaka omahiye yanatthawa ni othukumela nlattu wo woova. Khayanhimenrye ntthu itthu ile nlattu wo woova.

Yesu aheeconeha

⁹Nonwelenle, wicusuaya nihuku noopacera isumana, Yesu ahonkhumelela woopacera Mariya Mantalena, yola ankumihilyawe macini saapa. ¹⁰Uyo ahorwaa wacuweliha ale yakhanle ni Yesu, yeetta acukulaka ni yiikhupanyaka. ¹¹Ale nanso, wiiwa waya wiira Yesu ri nkumi, ni Mariya ahomoona, khayakupanli.

¹²Vahoolo aheeconehe nnanna nkina wasilopwana eeli yeetta ni iphiro, arwaaka omawaani. ¹³Ayo yahoturuwa wiira yacuwelihe akhwaya, nanso na ayo khayakupanli.

Yesu nawaakhumelela owiitthuca awe.

¹⁴Vahoolo waya, ahakhumelela owiitthuca awe khumi na mmoca alyaka, ni ahaakuphula nlattu wohikupali ni oturumala waya nrima, kontha khayaakupanli ale yamoonne nonwelenle. ¹⁵Ni aheerela: "Murwee ilapo yothene mwaalake atthu othene ni Nhupi Wooreera. ¹⁶Ntthu nohala okupali ni opatisiya nahala wooppwa, nanso ntthu hinhala okupali, nahala ohukhumwiya. ¹⁷Ikanyero cinhala waatthara atthu ookupali phi nnya: Mwancina naka, ankowomola minepa coonanara, ankowulumo moolumo oonaanano; ¹⁸ankovara inwaa, ni yawuryaka itthu yowiiva, khinhala weera itthu; ammowathatela matata arett, na ale anahala ovona."

¹⁹Vano, Apwiya Yesu anoolumanne owiitthuca awe yahakheleliya wirimu, ni ahonkoma moono nlopwana wa Nluku. ²⁰Na ale okhuma waya, yaholaka mapuro othene ni Apwiya yahaakavihera, yoneehaka nuulumo na Apwiya ni ikanyero cavelenle.

